

عبالحميرجوكه اليتحار

## تطبؤتك بكنبة تاهمز

## الحفيد

تأليف عبار لحميَّدجودَه السِّحارِ

لکنائٹ مکت بہمصیٹ ۲ ٹارع کاسام سکرتی۔البغالا

فى سكون الليل انسل حسين إلى غرفة النوم وهو يترنح من التعب ، كان يرتدى بذلته السوداء وهمى البذلة الوحيدة التى يملكها ولا تزال تحتفظ برونقها ، فهو لا يرتديها إلا فى المناسبات الهامة . وهل هناك مناسبة أهم من حفل زفاف ابنته الثانية ؟

إنه فى ليلة زفاف أحلام سقط مغشيا عليه لما أقبل عليه شفيق وفى يده نبيلة وقال له: « أنا جاى يا عمى أطلب منك نبيلة » ، فما كان يقادر على أن يحتمل فكرة أن يقاسى ما قاساه من متاعب حتى زفت أحلام إلى جلال . إنها متاعب هدته هدا وجعلته يضيق بكل من حوله وما حوله . ولكن ما إن قال له شفيق إنه يريد نبيلة . يريدها بحقيبة ملابسها حتى أفاق من غشيته . وقد صدق شفيق وعده فقد جاء بالمأذون وفى حفل متواضع تم كل شيء . . عقد القران وأخذ زوجه وانصرف .

وعلى الرغم من أن الحفل اقتصر على أفراد الأسرتين فقد كان شيئا مرهقا ، لقد وقف طوال النهار يشرف على إعداد المائدة التي أعدت إكراما للعريس الذي أظهر من الشهامة ما أثلج صدره ، ويذب عنها عادية أولاده سوسن وعاطف وهالة ــ التي عرفت المشي ــ فكانت تذهب إلى مفرش المائدة المتدلى على جانبيها وتجذبه بكل قوتها .

إن زوجته زينب لم تسمح للعروسين بالانصراف قبل أن ينتصف الليل ، فلما دقت الساعة المتواضعة المعلقة فى الصالة الثانية عشرة نظر شفيق إلى حماته مستعطفا ، فإذا بالدموع تنهمر من عينيها وتقول فى صوت مخنوق بالعبرات :

- \_ خلى بالك منها يا شفيق .
  - ــ دى في عني يا تنت .

وخرج شفيق وقد أخذ ذراع نبيلة تحت إبطه وذهبت زينب والأولاد خلفهما لوداعهما،وانسل هو إلى غرفة النوم يترنح حتى إذا ما بلغ السرير ارتمى عليه بملابسه وراح يملأ رئتيه بهواء يشده بأنفه شدا والزغاريد تدوى في أذنيه .

وميز زغرودة من بين الزغاريد ؛ إنها زغرودة سامى . وهم بأن يقوم لينهره فما أصبح يليق بطالب قد عرف طريقه إلى الجامعة أن يزغرد . إلا أن تعبه جعله يعرض عن رغبة القيام وتعكير دمه في شخط ونطر وهو يريد أن يستريح وأن يستريح طويلا .

ودخلت زينب الغرفة وهى ثوب السهرة . إنه ثوب غير ذلك الثوب الذى حضرت به زواج أحلام ، لقد أصرت على أن تشترى ثوبا جديدا لفرح نبيلة ، ثوبا يليق بالمصاهرة الجديدة وما كان له إلا أن يخضع .

ورأته ممدودا فى السرير بملابسه فتقدمت منه وراحت تخلع له الحذاء وهى تقول مداعبة : \_ أهو دلوقت لك حق تستريح . فقال وهو يحاول أن يخرج تعبه مع زفراته : هى فين الراحه دى ؟



 تستريج كتير .. كتير قوى لغاية سوسن ما تكبر وتجوزها .
 وكانت قد خلعت له حذاءه فذهبت تعاونه على أن يجلس فى السرير لتخلع عنه جاكتة البذلة ، فقال وهى ترفعه :

هو أنا لسه ح اعيش لما اجوز سوسن . . البركه فيكم بقى .
 فقالت وهي تخلع عنه الجاكتة :

ـــ والله ما حد ح يجوزها غيرك .. هو احنا لنا قيمه من غيرك . وراحت نفك الكرافتة وتعاونه على خلع القميص ، فلمـــا صار

وراحت تفك الكرافتة وتعاونه على خلع القميص ، فلما صار القميص في يديها إذا بفائلته مرصعة بدوائر فارغة ... فقالت في إنكار :

ـــ بقى دى فائله تلبسها يا حسين ! فيها إيه لو تشترى لك كام فائله ؟

وأخذت تفك الحزام الجلد المثبت للبنطلون ثم أزرار البنطلـون ، وقال :

ے منین یا حسرہ ؟! ہو انا قادر اتلم علی قرش . حقك یا زینب تمسكى إیدك شویه ، لسه ورانا كثير .

تتوقف عن فك أزرار البنطلون وتلتفت إليه فى شيء من الغضب : ـــــ يعنى شايفنى عماله أبعتر الفلوس شمال ويمين . والنبى لولا تدبيرى ماكنا قدرنا نعيش .

وصمت وكست وجهه موجة من الأسى . إنه لا يريد أن يشير الزوابع ، كل ماكان يريده أن ينام .. أن يستريح . وفطنت زينب إلى ما اعتراه فأرادت أن تخفف عنه فقالت :

- والنبى يا حسين ما تحمل هم ، ربنا كبير .. الأيام اللى جايه ح تفوت زى الأيام اللى راحت . كنت باقول لك دايما رزق البنات ورا الباب ما كنتش بتصدقنى . جالك كلامى بقى ؟



وراحت تخلع البنطلون وحسين يقول :

ـــ دا ربنا سترها بكرمه .

فقالت له وهي تتجه إلى الشماعة لتعلق البنطلون وتعود بالبيجاما : \_ ح يسترها على طول .

وعادت وقد وضعت جاكتة البيجاما على كتفها وأخذت تعد البنطلون لتدس رجليه فيه ، واستراح إلى ذلك التدليل الذي قلما استمتع بمثله طوال حياته الزوجية ، فرفع ساقه في الهواء فتقدمت زينب وغطتها بإحدى رجلي البنطلون . فأنزل الساق المرفوعة ورفع الساق الأخرى وهو يستشعر كأن أنامل رقيقة حانية تدغدغ عواطفه وإن كان كل

جسمه ينبض بالتعب.

وانتهت من إلباسه بنطلون البيجاما فجلس فى السرير ورفع ذراعيه كطفل طيب يحاول أن يعاون أمه على إلباسه ملابسه ، فما أن أدخلت ذراعيه فى كمى الجاكتة حتى استلقى على ظهره منهوكا والنوم يثقل جفنيه فيسدلهما على عينيه .

وزررت له أزرار الجاكتة ثم مالت عليه وقبلته قبلة خاطفة وقالت له : - تصبح على خير . نوم العوافى . عايز حاجه قبل ما تنام ؟ وذهبت لتخلع ثوبها فإذا به يقول و هو يتثاءب :

- عايز استريج ومش عايز حد يصحيني ولو الدنيا ادربكت .

وما أن أنتهى من كلامه حتى جاءت من الغرفة المجاورة أصوات ثائرة . إنها أصوات أبنائه وكان من الواضح أنهم يتشاجرون ، فهب من سريره وانطلق غاضبا إلى مصدر الصوت وكان آتيا من غرفة أحلام ونبيلة ، فدخل إليها كالعاصفة . وأتت زينب خلفه مهرولة مفزوعة تسأل :

- فيه إيه يا مقاصيف الرقبة ؟

رأى سوسن واقفة فى وسط سرير أحلام ، وعاطف واقفا فى سرير نبيلة عند رأس هالة التى نامت وقد انحسر ثوبها عنها حتى كشف بطنها ، إنها غارقة فى سبات عجزت الضجة من حولها عن أن توقظها أو تجعلها تتململ فى رقادها . ورأى سامى هائجا يمد يده لينزع سوسن من فوق السرير ، فلما سمع صوت أبيه يقول مستنكرا :

\_ ما شاء الله ..

أعاد ذراعه الممدودة وأطرق ينتظر قضاء أبيه ، فأسرعت سوسن تقول :

\_ الحق يا بابا . سامي ومراد عايزين ياخذوا أودة أحلام ونبيله بعد ما اتجوزوا .. مش الأوده دي للبنات ؟

فقالت زينب :

ــ ومن قال غير كده ؟

فقالت سوسن في انتصار:

\_ سامى .

فتقدم مراد وقال:

... الأوده دى ما حدش ح ياخذها إلا أنا وسامى ، سامى بقى فى الجامعه عايز يذاكر في هدوء ، وأنا عايز برضه أذاكر .

فقالت سوسن في تحد:

\_ من فلاحتك قوى ؟!

فقال لها حسين ينهرها:

\_ عيب يا بنت .

ثم التفت إلى سامي وقال:

\_ الأو ده دى للبنات .

فقال سامي متفلسفا ليظهر علمه واعتراضه :

\_ آدى اللي خدناه من قاسم أمين .

ـــوإيش حشر سي قاسم أمين جوز عمتك في الموضوع ده ؟ الراجل مسافر بره بقاله سنين .

فيلتفت حسين إلى زوجته ويقول شارحا :

\_ قاصده قاسم أمين محرر المرأة .

فقالت زينب معترضة ضائقة بهذا الزعم:

ــ ما هي طول عمرها حره .

فقال مراد:

ما هو اللي تخن ودان الستات ، خلاهم يتعروا في الشوارع ويتعلموا ويتوظفوا ويتزنقوا في الأتوبيسات .

فراحت زينب تلكزه في صدره بقبضتها:

ــ اخرس يا قليل الأدب .

فلم يعجبه أن تحجر أمه على رأيه فقال في انفعال :

ـــ هي كل حاجه في الدنيا بقت للستات ؟! والله لما أكبرلا انا عامل جمعيه تطالب بحقوق الرجاله .

فقال عاطف دون قصد:

ــ وانت مالك ومال الرجاله ؟

فاستشاط مراد غضبا ولولا وجود أبويه لضربه ، فراح يتوعده من بعيد وعاطف يهزأ بوعيده ، كانت العيون وملامح الوجه والشفاء هي أدوات التعبير الصامت التي ماكان للأبوين عليها سلطان .

ودار سامي على عقبيه لينصرف غاضبا من ذلك القرار الجائر ،

وذهبت زينب لتغطى هالة ، وفطن الأب إلى ضيق ابنه بقراره فقال :

ــ سامى ، تعال نتفاهم انت ما بقتش صغير .

فعاد سامي إلى حيث وقف أبوه وإن ظل مطرقا لا يرفع عينيه عن الأ. ض. . قال حسين :

... شوف یا سامی یا بنی ، إن واحده من إخواتك جت هی و جوزها حبوا يباتوا عندنا يباتوا فين ؟

فقال عاطف في حماس:

\_\_ يباتوا معايا ..

فجذبته أمه من رقبته وهي تقول:

\_ ما بلاش غلبه و لم لسانك ده اللي عايز قطعه .

وقال مراد وقد فطن إلى ما يرمي إليه أبوه :

\_ وإيه اللي حيخليهم يباتوا عندنا ؟

\_ الظروف يا بنى بتحكم ، إن جم يباتوا عندنا ما فيش غير الأوده دى يباتوا فيها ، وساعتها ناخذ سوسن وهاله فى أودتنا . فهمت يـا سامى ؟

فرفع سامي رأسه ونظر إلى أبيه في رضا وقال :

\_\_ فهمت یا بابا .

وانسل سامى إلى غرفته وقد أخذ عاطف فى يده ، وتمددت سوسن فى سرير أحلام وقد أركبت ساقا على ساق وهى تستشعر نشوة الانتصار ، وذهب حسين إلى غرفته وتبعته زينب ، وبقى مراد ينظر إلى سوسن في غيظ فلما رأته قالت في شيطنة :

ــ يحيا قاسم أمين محرر المرأة .

فأسرع إليها مراد وأخذ اللحاف ليكتم به أنفاسها ، فإذا بها تهم بالصياح :

\_ يا ماما .

ففزع مراد وألقى اللحاف من بين يده وفر مرعوبا إلى غرفة البنين .

وقفت زينب في المطبخ تغسل الصحاف التي تناولوا فيها الغداء ، وجلس حسين يقرأ الصحف في الشرفة ، واجتمع الأولاد حول الراديو يسمعون إذاعة وصف إحدى مباريات كرة القدم ، وإذا بعاطف ينسل إلى المطبخ ويقول لأمه :

\_ رايح اتفرج على الكوره في التلفزيون عند الجيران .

فقالت له:

\_\_ بس ما تتشاقاشي .

وعرف أن ذلك تصريح له فراح يهرول خارجا ، فلقيته سوسن فقالت

له:

\_ على فين ؟

ــ ح اتفرج على الكوره فى التلفزيون .

فانطلقت سوسن إلى أمها وقالت لها :

... ح اروح مع عاطف.

فقالت زينب وهي مستمرة في عملها :

\_لأ.

فذهبت سوسن إلى الشرفة حيث جلس أبوها وقالت :

ــ بابا ح أروح مع عاطف أتفرج على الماتش في التلفزيون .

فقال لها دون أن يرفع عينيه عن الصحيفة التي كان يقرأ فيها :

ـــ قولى لماما .

فعادت إلى أمها وقالت لها :

\_ يا ماما أروح مع عاطف .

فقالت زينب في غضب :

\_ قلت لأ يعني لأ .

ققفلت سوسن عائدة إلى أبيها وقالت :

\_ يا بابا ح اروح مع عاطف .

\_ قلت لك استأذني من ماما . . أنا ماليش دعوه .

فقالت سوسن لتثير كرامته:

\_ إنت عايز تقول إنها بتمشى كلامها عليك !

\_ يا سوسن لازم تعرفي إن هي المسئوله عن البيت ده .

وانسحبت وهي تستشعر أن أباها قد خذلها ، وعادت إلى المطبخ وقالت لأمها في توسل :

\_ والنبي يا ماما أروح مع عاطف .

فأخذتها زينب بين يديها وهزتها في عنف وهي تقول لها في غضب : \_ هو أنا ميت مره ح اقول لأ .

ـــ هو ان ميت مره ح اهون له . فانطلقت غاضبة إلى حيث جلس أبوها و قالت منفجرة : \_ مش ح تطلق الست دى بقى و تريحنا .

ونحى حسين الصحيفة بعيدا ونظر إلى سوسن وهو يتصنع الغضب وإن كانت كل ملامحه تفصح حقيقة ما يحسه من انبساط ، وقال :

- \_ إنت عارفه لو ماما سمعتك ح تعمل فيكي . إيه ؟
  - ـــ عارفه .
  - ــ طب وقولتي كده ليه ؟
    - \_ طهقت .

وخرجت زينب من المطبخ فرأت سامي ومراد ينصنان إلى الراديو في اهتام ، فوقفت ترنو إليهما في حنان ثم قالت :

- ــ بقى لو كان الماتش بيتذاع م التلفزيون مش كان أحسن .
  - فقال مراد بسخرية :
  - ــ لو .. هو فين التلفزيون ده ؟
  - ... اطلبوا من بابا يجيب لكو تلفزيون .
    - فقال سامي في إنكار:
      - ـــ هو ده معقول ؟
  - ـــ مش معقول ليه ؟ هو بابا عمره اتأخر لكو على حاجه .
    - فالتفت مراد إلى سامي وقال له:
    - ــ روح يا سامي قول لبابا يجيب لنا تلفزيون .
      - ـــ ما تروح انت .
    - \_ لأ .. انت أكبرنا ما يصحش اتقدم عليك .

\_ أنا يا سيدى متنازل لك عن حقى ده .

فنهض مراد وراح يلملم شجاعته وذهب إلى حيث كان أبوه وأمه ترقبه من بعيد ، كان حسين قد أجلس سوسن على ركبتيه وكان يحاورها وكان حديثها فيه ذكاء جعل نفسه تصفو وقد انعكس صفاء وجدانه على صفحة وجهه ، فلما قرأ مراد الرضا في ملامح أبيه شد ذلك أزره فقال :

- ـــ بابا .
- \_ نعم يا مراد ؟ '
- \_ عايزين تلفزيون .

وأحس مراد كأنما أزاح جبلا عن صدره ، ولكن سرعان ما انكمش لما سمم أباه يقول في غضب :

\_\_ بلاش مسخرة .

وكأنما فتح أمام سوسن بابا لم يخطر لها على بال فقالت :

\_ مش ده يا باباأحسن ما نروح عند الجيران .

وأنزلها من على ركبتيه وقال لها:

\_ روحي بلاش غلبه .

ورأت زينب أن الوقت أصبح مناسبا لظهورها على مسرح الأحداث ، فدخلت عليهم وهي تتظاهر بالبراءة وقالت :

\_ فيه إيه ؟

استراح حسين لدخولها و لم يدر أنها القشة التي يتعلق بها الغريق فقال كأنما يلوذ بها و يلتمس منها العون : \_ تعالى شوفي ولادك عايزين إيه ؟

ولحق سامی بهم وإذا بسامی ومراد وسوسن یقولـون فی صوت واحد :

\_ تلفزيون ..

وفي فزع يلتفت حسين إلى زوجه ويقول كأنما يستغيث بها :

\_ عاجبك كده ؟

فقالت زينب في هدوء :

ـــ ربنا يخليك لهم .

وأحس أنها خذلته فقال في ثورة :

\_ يخليني ؟! وحجيب منين ؟

لعت في ذهن سامي فكرة فقال:

\_ نشتريه بالتقسيط .

وقال مراد:

\_ بالتقسيط المريح .

والتفت إليه الأب وقال ساخرا :

\_ بالتقسيط المريح ؟ وندفع القسط منين ؟

فقالت سوسن :

\_ من مصروفنا .

وقال مراد مؤيدا :

... من مصروفنا .. مش كده يا سامى ؟

( الحفيد )

فقال سامي وهو يهز رأسه موافقا:

ــ كلنا موافقين طبعا .

و لم يشأ حسين أن يهزم فقال:

ــ نفرض إننا ح نوافق على الكلام الفارغ اللي بتقولوه ده ، طب المقدم ندفعه إزاى ؟

وحسب الرجل أنه وضعهم أمام مشكلة ، فإذا بالزوجة تقول :

\_ أنا عامله جمعيه من الجيران وقبضتها .

فقال مراد في فرح:

ــ برافو يا ماما ، يا أحسن ماما في الدنيا .

وأسقط في يد الزوج فقال غاضبا :

\_ لا ، دى مؤامره .

وأيفنت زينب أن كل شيء قد أحكم فقالت وهي تنسحب إلى الداخا. :

ــ أنا مالي .. ولادك عندك اتصرف فيهم .

وغادرت زينب المكان فالتفت حسين إلى أولاده وقال :

ــوالمذاكرة ؟!

ـــ قبل الامتحانات بتلات شهور ما حدش ح يفتح التلفزيسون الــــ

خالص .

وقال سامي مردفا:

ـــ ده وعد شرف .

فقال حسين وهو يغادر الشرفة :

\_ ده كلام فارغ .. دى مسخره .. التلفزيون مش ح يدخل البيت

ده أبدا طول ما أنا عايش.

وضع التلفزيون في الصالة والتف الأولاد حوله وقد ارتسم البشر في وجوههم ، وراحت زينب ترنو إليهم في فرح فقد نجحت في أن تحقق لهم أمنية غالية . وما شذ عنهم سوى هالة ، كانت تداعب عروسة صنعتها لها أمها من خرقة بيضاء وبعض القش الذي تجمع لديها .

كان التلفزيون يعرض فيلما أجنبيا فلم يستحوذ على كل انتباههم بل

ترك لهم فرصة الحديث والحوار ، قال مراد : \_\_ والله أنا اقدر أخلى التلفزيون ده سكوب .

فقالت زينب في سخرية :

ـــ أيوه ، خسره زى ما خسرت الراديو .

فقال مراد مدافعا عن نفسه :

ـــ الحق على اللي صلحته لكم .

فقالت زينب في مرارة :

ورن جرس الباب الخارجي فنهضت سوسن وقالت في فرح:

ــ بابا .. بابا ..

وجرت إلى الباب وفتحته ، وما كاد يخطو إلى الداخل خطوة حتى قالت له فى انشراح وهى تجذبه من يده :

\_ تعال اتفرج على التلفزيون .

ودخل على الأولاد وقد جلسوا يتابعون الفيلم فألقى عليهم نظرة ارتياح وقال :

\_ السلام عليكم .

ولم يرد عليه أحد السلام بل قال له عاطف :

\_ هش .

وفي صمت أفسحت زينب له مكانا إلى جوارها فتقدم وجلس ، وأدار عينيه في المكان فلمح هالة تلعب بعيدا فقال في عتاب :

\_ هي هاله بس اللي مالهاش نفس!

وذهب إلى حيث كانت هالة وحملها فى حنان وقبلها ثم عاد وأجلسها فى حجرة وراح يوجه نظرها إلى التلفزيون ، فإذا بالطفلة تسرتجف وتصرخ فى فزع ، ولفت خوفها أنظار إخوتها فانفجروا يضحكون .

ونهضت زينب وأخذت الطفلة وضمتها إلى صدرها تسكينا لروعها وراحت تهدهدها وتقول لها في حنان دافق :

ـــــ اسم الله .. ما تخافيش يا روحي .

واستكانت الطفلة فى حضن أمها ، وكأنما عز على زينب أن تظل واقفة فقالت :

ـــ انتو مش ح تتعشوا ؟

فقال سامي:

\_ هاتي لنا العشا هنا .

ونظرت إلى زوجها فإذا به يهز لها رأسه موافقا فقالت :

\_\_ تاكله ا إيه ؟

فقال حسين في عدم اهتمام:

\_ اللي تجيبيه ، اللي عندك .

ـــ أنتو ح تحيروني ! ما تقولوا تاكلو إيه ؟

فقال مراد:

هال مراد:

ــ بيض .

فقالت كما اعتادت أن تقول :

\_ هو كل يوم بيض ؟ هو انتو تعايين ؟

فقال حسين مؤيدا رأى مراد:

- والله البيض ألذم الفراخ .

\_ أعمله لكم سندويتش ؟!

فقال سامي معترضا :

سائل سامي معرضا . \_ لأ . أنا احب اغمس .

وقال عاطف:

ـــوانا .

ومدت يديها بهالة إلى حسين و الت:

\_ طب خد بنتك على ما احضر العشا .

وذهبت إلى المطبخ وعادت تحمل صينية عليها صفحة قلى فيها البيض وصحاف الجبن والزيتون وضعتها على منضدة صغيرة بسينهم وبين التلفزيون . وراحوا يأكلون ويتابعون الفيلم . وأبت هالة أن يطعمها أبوها وأصرت على أن تأكل بيدها . وراحت تأكل فلما وجدت أن أصابعها قد تلوثت بالبيض تلفتت حولها فلم تجد أقرب من كرافتة أبيها أصابعها .

وفزع الأب وقال:

\_ إيه ده ! . . إيه ده يا بنت ؟

وأحست هالة أنه ينهرها فبكت ، فما كان من زينب إلا أن خطفتها منه وضمتها إلى صدرها وهي تقول له :

\_ خضيت البت .

فقال حسين و هو يحاول أن ينظف الكرافتة بمنديل أخرجه من جيب بنطلونه :

\_ هو انا لاقيها منها واللا من سامي !

فقال سامي في استياء:

\_ و ماله سامي راخر ؟

\_ هو انت مخليني اتهني على كرافته .

\_ حتى أنا ما بالبسى كرفتات .

- . ـــ ويوم الخميس والجمعه ؟
- ـــ إيه يعني يومين في الجمعه .

وينظر حسين إلى المنديل الذى اتسخ ويرى أن يغيره ، فيذهب إلى غرفة النوم ويفتح الدرج الذى يضع فيه المناديل فيجده خاويا ، فيعود ثائرا ويقف عند الباب ويقول :

ــ ولا مُنديل في الدرج! أمال المناديل راحت فين ؟

فتقول سوسن دون أن تلتفت نحوه فقد كانت تحاول أن تتتبع الفيلم:

ــ أنا شفت سامي وهو بياخد منديل الصبح .

فتقول زينب :

\_ أنا حطه تلات مناديل مكويه بإيدى .

فيقول حسين في غضب:

\_ طب الباقي راحوا فين ؟

فتقول سوسن في بساطة:

ـــعاطف خدواحدوأنا خت واحد .. يعني نروح المدرسه من غير مناديل ؟

فيقول حسين وقد خفت حدة غضبه :

ــ ما شاء الله ! .

ويذهب حسين ويجلس ليتابع القصة ، وما كاد يستقر في جلسته حتى قال له مراد :

\_ یا بابا انت مش ح تشتری لك شرابات ؟

فقال حسين في هدوء:

\_ عندى شرابات كتير .

\_ لأ .. ما عندكش .

\_ وإيش عرفك يا سي مراد ؟

\_ جيت آخذ شراب الصبح ما لقيتش.

يلتفت حسين إلى زينب فتحس أن في نظراته عتابا . فتسرع بالدفاع عن نفسها :

و الله شراباتهم ومناديلهم في ادراجهم ، بس هم اللي عنيهم زايغه . وساد الصمت ، كان يعرض على شاشة التلفزيون منظر غرامي . وخفق قلب حسين ، كان يرجو أن ينتهي المشهد سريعا ولكن المشهد طال وانتهي بقبلة بين البطل والبطلة . ومن طرف عينيه راح يراقب أولاده . . رأى سوسن وعاطف قد أطرقا في خجل أما سامي ومراد فقد أخذا يتابعان المشهد بكل حواسهما . والتقت عينا حسين بعيني زينب وما لبث حسين أن نهض وانصرف إلى غرفة النوم فقامت زينب وقلها وما لبث حديدها وخوف قد غمرها وتبعته ، فلما أحس دخولها قال لها يعتاب .

\_ عاجبك كده ؟ عاجبك الخساره دى ؟

\_ خسارة إيه ؟ أنا ما اخفشي على ولادي ، أنا ولادي مؤدبين ، شفت سوسن وعاطف عملوا إيه ؟!

وراحت حوادث القصة تتتابع على الشاشة والأولاد يتتبعونها ف

اهتام ، فالقصة قد استولت عليهم وإن كانوا لا يفقهون من الحوار الدائر بين الممثلين شيئا .

وعاد البطل يقبل البطلة فإذا بعاطف يلكز سوسن بمرفقه ويقول فى انشراح : ـــعلَّقها ! وقف حسين أمام المرآة يحلق ذقنه ، وسمع وقع أقدام بالقرب منه فالتفت فرأى مراد وفي يده صحيفة فقال :

ــ هو الجرنال جه يا مراد ؟

ـــ أيوه يا بابا .

\_ طب تعال اقرا لى صفحة الوفيات ، يمكن نعرف حد فيهم . ففتح مراد صفحة الوفيات وتقدم حتى وقف إلى جوار أبيه ، وقبل أن

يفتح فمه قال له حسين:

ــ اقرا اللي مكتوب بالبنط الأسود كفايه .

فراح مراد يقرأ:

- مجلس مدينة بلبيس .. مدرسة التجارة الثانوية بقطور .. الحرية الثانوية التجارية للمعلمين ببندر الثانوية التجارية للبنات بشبين الكوم .. اللجنة النقابية للمعلمين ببندر بنها .. أسرة مدرسة النصر بطلخا .. معهد دمياط الأزهرى .. مدرسة سلامون قبلى للبنات .

ــــ إيه ده يا مراد .. باقول لك صفحة الوفيات مش صفحة التربية والتعليم ! ــ ما هي دي يا بابا صفحة الوفيات ، وده المكتوب بالبنط الاسود .

\_ طب سيب الجرنال واتفضل انت .

وترك مراد الصحيفة وانصرف ، وما كاد مراد يخرج حتى دخلت زين وقالت في هدوء :

\_ أحلام وجوزها وحماها وحماتها ، ونبيلة وجوزها جايين يتغدو عندنا يوم الجمعه .

وترك حسين الحلاقة والتفت إليها وقال:

\_ مين اللي قال لك ؟

\_\_ أحلام بعتت لي .

\_ قالت لك إنها هي واختها جايين في يوم واحد ؟

\_ أيوه .

ونظر إليها فاحصا ثم قال نافد الصبر:

ـــ والله انت اللي روحتي عزمتيهم .

\_أنا .. أبدا والنبي دنا يا دوب خطفت رجلي امبارح ورحت دفعت

قسط التلفزيون .

\_ وبعتت لك أحلام إمتى ؟

\_ امبارح العصر .

ـــ وما قلتليش بالليل ليه ؟

فقالت وهي تدور على أعقابها لتنصرف :

\_ قلت ما انكدش عليك قيل ما تنام .

وقبل أن تنصرف جاء سامي وقال:

\_ عايز تلاته جنيه .

\_\_ تلاته جنيه .. ليه ؟

\_ كتاب جديد نزل امبارح في الكليه .

ــ هو كل يوم ملازم جديده وكتاب جديد .

\_ ما هي الجامعه كده يا بابا .

وجاء عاطف يعدو وقال:

\_ عايز قرش .

فالتفت حسين إلى سامي وعاطف وزينب وقال:

ــ انتم مش قلتوا ندفع أقساط التلفزيون من مصروفكم .

فقال عاطف وهو يرفع كتفيه نافيا :

\_ أنا ما قلتش .

وذهب حسين إلى حيث علق بذلته وأخرج حافظة نقوده وأعطى سامى ثلاثة جنيهات فانصرف شاكرا ، وأعطى عاطف قرشا فراح عاطف يقلب القرش فى يده ، ثم رفع رأسه ينظر إلى أبيه وقال :

ـــ انت مش شایف یا بابا إن القرش ما بقاش یشتری حاجه ؟ `

فقال حسين وهو يدفع ابنه لينصرف :

ـــ قول كده للحكومه .

وراح حسين يرتدي ملابسه ، وأرادت زينب أن تخفف عنه فقالت : ــ عندي كام زغلول في السطح أدبجهم وكام فرخه ، أهم يسدوا

خانه يوم الجمعه .

ــ تفتكري دول يكفوا مصطفى علوان ؟ دا عايز له هم كتير .

کله یدبر .. دیك رومی نحطه فی وسط السفره ، و كام فرخه
 و كام حمامه ، وشویة بفتیك وصینیة رقاق ، ونحشی شویة و رق عنب ،
 و كان الله بالسر عليم .

ــ ولازم الديك الرومي ده ؟

ـــدى أول مره يتغدوا عندنا ، عايزهم يقولوا علينا إيه ؟

وأطرق حسين قليلا ثم قال :

ـــ وح يحلوا إيه ؟

ـــــ هات معاك بالمره كام كيلو موز وكام كيلو برتقال ، وأنا عندى لبن ح اعمل رز بلبن .

وهز حسين رأسه يأسا وسخريةوذهب إلى مكتبه . كان يكتب أرقاما في ورقة . إنها الأثمان التقريبية للأشياء التي سيشتريها . ولما انتهى من كتابة الأرقام وجمعها أخرج من جيبه حافظة نقوده وأخذ يعد ما بها ليطمئن إلى أن ما بقي معه يكفى لشراء ما أملى عليه .

وأعاد الحافظة إلى جيبه وشرد مفكرا فإذا بصورة زينب تطفو على سطح ذهنه ، وإذا بصوتها يرن فى وجدانه : والنبى لولا تدبيرى ما كنا قدرنا نعيش . . وكادت تستولى عليه كآبة إلا أنه نهض وهز رأسه فى عنف كأنه كان يطرد الأفكار السوداء التى كادت تهاجمه لتفترسه . وأراد أن يسمع نفسه صوت الرضا والاستسلام فقال فى صوت مسموع : \_ الله جاب الله خد . . الله عليه العوض .

وفى العصر كان حسين وأولاده فى السوق: حسين عند الخضرى، وسامى عند الفاكهى، ومراد فى الجمعية التعاونية، وعاطف عند مخبز قريب من البيت. وعادوا جميعا إلى الدار وهم يحملون ما اشتروه .. ورن جرس الباب فأسرعت سوسن وفتحته فإذا بحسين يدخل وهو يحمل لفائف بها بطاطس وقوطه وبسلة وجزر وقد أسند اللفائف بيده إلى صدره وفى يده الأخرى كرنبة، وإذا بسامى يحمل موزا وبرتقالا، ومراد يحمل ورقا به اللحم، وعاطف قد رفع على رأسه كيسا به خبز. فلما رأت سوسن أياها صاحت:

\_ كرنب .. كرنب يا ماما .

فجاءت زینب مسرعة ، فلما رأت زوجها یکاد یختفی خلف ما یحمل قالت :

\_ شايل كل ده ؟! إن شا الله ما انشال و لا اتاكل.

وأسرعت تأخذ الكرنبة من يده وتخفف عنه بعض ما يحمــل، وسارت إلى المطبخ وهي تقول:

- كان لازم يعنى الكرنب .. هو كان وحمه ؟
  - ــ ما لقيتش ورق عنب .
    - ــ ما كانش لازم .

ووضعت الأم الأشياء في المطبخ ، وما كاد حسين يأخذ نفسه حتى قالت له : \_ والنبى يا حسين تروح تغير هدومك وتيجى تساعدنى فى تقشير البطاطس والجزر ، وانت يا سامى تفصص البسلة عبال ما اسلم الكرنبة .

فقال سامي:

\_ أنا عندى مذاكره.

\_ يعنى حبكت النهارده ؟!

\_ خلى مراد وسوسن يفصصوها .

\_ مراد وسوسن ح يقشروا البصل .

قال مراد:

\_ اشمعني أنا اللي اقشر البصل كل مره ؟

... عشان تنضف الحبر اللي دايما في صوابعك .

وذهب حسين إلى غرفته وسرعان ما عاد ولبس فوطة المطبخ وراح يقشر البطاطس والجزر ، وترك مراد البصل ، وانسل الأولاد ليشاهدوا التلفزيون .

ووضعت الحلل على النار ، وخرج حسين وزينب من المطبخ يبدو عليهما الإجهاد ، ونظرت زينب إلى حيث تجمع الأولاد وقالت :

- كفايه لعب بقى تعالوا نوضب السفره . اعملوا حاجه نافعه مره . فقام الأولاد فى تكاسل وذهبوا للمعاونة فى إعداد المائدة ؛ إن مائدتهم صغيرة لا يمكن أن يجلس حولها كل المدعوين غدا فراحوا يفكرون فى وسيلة يمدون بها المائدة ، فأتوا بمائدة المطبخ ووضعوها إلى جوار مائدتهم

وغطوا المائدتين بمفرش أبيض.

ووقفت زينب تعد الكراسي ، ولما كانت تعرف تماما عدد الذين

سيجلسون حول المائدة قالت في سم عة:

\_ ناقص أربع كراسي .

ووقف حسين مفكرا وقال:

\_ وإيه العمل دلوقت ؟

\_ و لا حاجه ، بكره نستلفهم من الجيران .

وقالت لسوسن:

\_ عدى ياسوسن الشوك والسكاكين.

و بعد لحظة قالت:

\_ والا بلاش ، أنا عارفه انهم مش ح يكفوا ، نستلف شوك و سكاكين الجيران.

فقال حسين متبرما:

\_ هو كله من الجيران ؟

\_ یا سیدی الناس لبعضها .

وراح عاطف يعد الأكواب فإذا بكوب يسقط من يده ويتهشم ،

فقالت زينب:

\_ إيه ده يا مقصوف الرقبه ؟

\_ كنت باعد الكوبيّات .

( الحفيد )

ــ مين قال لك تعدهم ، ميت مره قلت لك ما تمدش إيدك على

حاجه ، مره تانیه تکسر حاجه ح اکسر رقبتك .

فرماها عاطف بنظرة غاضبة وقال:

\_ ماتشخوطیش فی کده . انتی عایزه تعقدینی .

اجتمع الجميع حول مائا.ة الطعام ؟ كان حسين على رأسها وعن يمينه مصطفى علوان ثم زوجته ثم أحلام وجلال ، وعن يساره شفيق فنبيلة فسوسن فزينب \_\_ لتكون قلب المائدة التي تقوم بتوزيع الطعام ذات اليمين وذات الشمال \_\_ فسامى وقد جلس قبالته مراد ، وعلى رأس المائدة من الحهة المقابلة جلس عاطف يتنازعه أكثر من انفعال ، إنه لا يدرى أأجلس في ذلك المكان ليبعد عن الطعام أم تكريما له ؟

وراحت هالة تدور حول المائدة ، إنها حائرة لا تعرف مكانها . كانت الأم تحسب أن كسرة خبر أو دبوسا من حمامة سيلهيها عنهم ؛ ولكن اتضح أن هالة لن ترضى بأقل من أن تجلس على كرسى خاص بها منلهم . فذهبت إلى حيث كان يجلس أبوها ، فلما رآها حملها ليجلسها فى حجره ، ولكنها أبت وهمت بالبكاء فإذا بمصطفى علوان يتلفت فيرى كرسيا خاليا فيقوم ويحضره ويضعه بينه وبين حسين ، ويحمل هالة ويجلسها عليه وهو يقول :

ـــدول بركه ، دا ربنا بيرزقنا برزقهم .

ونهضت زينب وتناولت شوكة وسكينا وراحت تحاول أن تقطع

الديك الرومى الذى توسط المائدة ، فراح مصطفى علوان يرقبها وقد تحلب ريقه . إنه لا يستطيع أن يكبح شهوته للطعام حتى تنتهى زينب من التقطيع ، فنهض وقال وهو يمد يديه ليحمل الصحفة والديك :

\_ عنك انتي يا ست .

ولما أصبح الديك أمامه راح يمزقه إربا إربا بيديه وهو يستشعر لذة العبث في لحم طرى ، ثم أخذ يوزع على الجميع أنصبتهم . فلما همّ بوضع قطعة أمام أحلام أدارت وجهها اشمئزازا وقالت :

ــ بلاش يا عمى ، أنا مش طايقه آكل لحمه واللا أشم ريحتها .

وتهلل وجه زينب بالفرح .. فطنت إلى أن ابنتها تتوحم ، لقد حملت أحلام دون أن تزف إليها البشرى السعيدة التي كانت تنتظرها ، فرنت إليها في حب وحنان وقالت :

\_ أجيب لك حاجه تانيه ؟

فقالت أحلام:

\_ حتت جبنه قديمه إذا كان عندك .

ــ عندی یا حبیبتی .

وغادرت زينب المائدة وهي تكاد تطير من الفرح ، وغابت قليلا ثم عادت تحمل قطعة من الجبن وضعتها أمام ابنتها .

ـــ اتفضلي يا حبيبتي .

واستمر مصطفى فى توزيع الأنصبة فوضع أمام زوجته أطيب ما فى الديك ، ووضع لعاطف قطعة صغيرة، فراح عاطف ينظر إليه نظرات تنطق بعبارات واضحة « هى دى اللى هانت عليك ؟ هو ديك أبوك ؟ » و لم ينس بالطبع نفسه فقد خصها بطبلة الديك ونصفه الأسفل .

ونظرت إليه زينب وقالت في مجاملة :

\_\_ انت ما خدتش حاجه .. خدت العضم .

فقال مصطفى علوان وهو يدس في فمه أسمن ما في الديك :

\_ أصل أنا أحب امصمص العضم .

وقال حسين مداعبا :

\_ ما ينوب اللي بيقسم إلا مصمصة صوابعه .

وانهمك الجميع في الأكل وكانت زينب تصوب عينها إلى نبيلة ، فإذا ما التقت الأعين كانت تسبّر لها برأسها إلى أحلام ؛ كانت تسألها عما إذا كانت قد حملت مثل أختها . وقد فهمت نبيلة ما تقصدة أمها فهزت رأسها نفيا ، فظهر القهر في وجه الأم ولوت شفتها السفلي ووسعت عينها وهزت حاجبها وصعرت خديها ، وفهمت نبيلة أن أمها تقول لها با خابه .

والتفتت سوسن إلى نبيلة وقالت لها:

... والنبي يا نبيله وانتي يا أحلام ما تبقوش تغيبوا علينا كده .

فأشرق وجه نبيلة بابتسامة ومالت على سوسن ولولا أن فمها كان مملوءا بالطعام لقبلتها ، وقالت لها :

\_ وحشناك يا روحي ؟

فقالت سوسن في بساطة:



## \_ لا . أصل احنا ما بنشوفش الأكل د إلا لما بتيجوا .

وارتبك حسين ، ونظرت زينب إلى سوسن نظرة غيظ ، وظهر الغيظ في وجه أم جلال ، وارتبكت أحلام ، وراحت نبيلة تلكز أختها في جنبها لكزات خفية ، أما مراد فقد ضحك في براءة فإذا بأمه تصوب إليه نظرات نارية فقطع ضحكه فجأة .

وقام عاطف يلملم العظم من على المائدة ، فصاحت أمه فيه قائلة : ـــ بتعمل إيه يا ولد ؟

ــ بلم العضم للكلب ، واللا يعني انتو تاكلوا وهو ما ياكلش .

ــ سيب ده دلوقت .

وتمطى مصطفى علوان والتفت إلى زينب وقال:

ـــ إيد ما نعدمها .. كان يوم مبروك يوم ما جيتي وعزمتينا .

وطرق قوله رأس حسين طرقا عنيفا فالتفت إلى زينب وكانت ترقبه بطرف عينها ، فلما رأت كل ملامحه تصرخ فيها : بقى كده ؟ انكمشت وراحت تنظر إلى بقايا الطعام التي أمامها . وأحست أن ذلك ليس كافيا ؛ إنها تريد أن تفرّ من المكان فنهضت وراحت تلملم ما على المائدة من صحاف وشوك وسكاكين لتختفي قليلا في المطبخ حتى يسكن روعها . وأسرع سامر بضع على المائدة صحاف الموز واله تقال ، فلما عادت

وأسرع سامي يضع على المائدة صحاف الموز والبرتقال ، فلما عادت زين ورأت ذلك قالت :

\_ تحلو بالرز بلبن قبله ؟

فقالت أم جلال:

\_ كفايه كده .. الخير كتير .

فعادت زينب إلى مكانها ، وكأنما أرادت أم جلال ألا ينتهى الغداء دون أن تنغز زينب ، فقالت :

\_ سایبه نفسك كده لیه یا ست زینب ؟ مش شایفه إنك زدتی كتير !

وأحست زينب لسع نقدها يشويها ، إنها كانت تزهو برشاقتها .. وها هي ذي حماة ابنتها التي شد جلدها على عظمها تسخر منها . وضاقت زينب بتلك السخرية ولكنها كتمت غيظها وأمسكت لسانها . وقال مصطفى علوان مداعبا:

\_ ما هو اللي ياكل الأكل ده لازم يسمن .

ورأت زينب الفرصة سانحة لتسخر من حماة ابنتها فقالت :

ـــ فيه ناس الأكل ما طرح ما يسرى يمرى ، وفيه ناس زى العرسه تاكل وتنسى .

وظهر الغيظ فى وجه الحماة ، و لم تر منفسا له إلا أن تنهض وتغادر السفرة ، فإذا بالجميع ينهضون ويخرجون إلى الصالة وزينب تسأل كلا منهم :

\_ قهوه ولا شاي .

وجلسوا يشربون القهوة ويتسامرون ، ونظر شفيق في ساعته وقال : ــــ ماتش الكوره .

فنهض حسين وضغط على زرار التلفزيون ، وبعد لحظات ظهرت الصورة كشريط في منتصف الشاشة فقال حسين في فزع :

\_ إيه ده ؟ مين اللي عمل كده ؟

فقالت سوسن ، جهاز الإذاعة المنزلية :

ـــ مراد عمله سكوب .

وقال جلال :

ــ بسيطه .. زرار من ورا يعدل الصوره .

ونهض جلال ليصلح التلفزيون وإذا بشفيق يقول له :

ـــ إيه رأيك يا جلال نروح النادي نتفرج ع الماتش . . أنا ونبيله وانت

وأحلام .

فصاح عاطف:

ــ وانا .

وإذا بزينب تقول:

\_ لا والنبي ، بلاش أحلام ، بلاش تتمخمض اليومين دول .

انقضى الليل وزينب تتقلب فى فراشها لا تغمض لها عين . إن قول حماة ابنتها « سايه نفسك كده ليه يا ست زينب ؟ مش شايفه إنك زدتى كتير » يلهب عواطفها ويخز روحها وخزا أيما . إنها تستشعر أن جسمها قد امتلاً وأنها فقدت كثيرا من رشاقتها ولكنها ما كانت تظن أنه سيأتى ذلك اليوم الذى ستكون فيه بدانتها موضع سخرية ، وما خطر لها على قلب أن تصبح هدفا لهزء حماة ابنتها .

حاولت أن تغمض عين أفكارها عن ذلك القول إلا أن الصوت الهازئ كان يفح في أعماقها فحيح الأفعى ، وصورة المرأة قد انفرج فمها عن ابتسامة صفراء لم تنثن عن مرقدها . إنها باتت تتعجل النهار لترى رأيها في هذه السمنة وتعمل على إزالتها .

وأحس حسين تقلبها ذات الشمال وذات اليمين فطار النوم من عينيه و لم يشأ أن يحادثها لعلها تنام ؛ ولما وجد أنها مستمرة فى قلقها قال لها : ــــ مالك يا زينب قلقانه ليه الليله دى ؟ بتفكرى فى إيه ؟

وهمت بأن تفضى إليه بحقيقة ما يشغلها ولكنها وجدت أن الأوفق أن تصبر حتى تجد الحل لمشكلتها ، فقالت لتفر من هواجسها : ـــ بفكر في أحلام .. بنتوحم على تفاح .

بتفكري في أحلام واللا في نفسك .

ودق قلبها فى صدرها خوفا . ترى هل استشف من قلقها شيئا ؟ وسرعان ما انقشع ذلك الخوف لما قال لها :

ــ خايفه تبقى جده ؟

جده ؟! هو عشان ما اتجوزت صغیره ، حلوه دی .. أنا طول
 عمری ح ابقی ماما زوزو وانت بابا حسین .

وراح يداعبها وهو يقول :

\_ أنا جدو حسين .

وأشرقت الشمس وأسرعت سوسن إلى الحمام وأغلقته خلفها . وجاء سامي وعلى كتفه الفوطة وراح يفتح باب الحمام ، فلما علم أن سوسر بداخله قال متأففا :

ــ هو احنا خلصنا من نبيلة طلعتي انت لنا ؟

وكانت زينب في طريقها إلى المطبخ ، فلما سمعت قوله قالت :

ــ والله هي اللي ا ستريحت من وشك .

فقال سامي في استسلام:

ـــ يا فتاح يا عليم .

وسمع طرق الحذاء على الباب فصاحت زينب:

ـــ مراد ، افتح لاخوك الباب .

وقام مراد يتمطى ، فانلته قد خرجت من تحت بنطلون البيجاما وتدلت من الجاكتة ، وذهب إلى الباب وهو بين النائم واليقظان وفتحه فإذا بعاطف يدخل مهرولا ويقول :

\_ جبت بيضتين من عند الفراخ .

فخرجت زينب من المطبخ وقالت في إنكار:

يس بس ؟

فقال عاطف يفسر لها السر:

... ولقيت في العشه قشر كتير.

ونادت زينب في غضب :

ــ مراد . . سواسن .

وخرجت سوسن من الحمام وذهبت إلى حيث كانت أمها فى الصالة ، وجاء مراد وهو يسبل عينيه كأئما يخشى أن يستيقظ ، وقالت لهما الأم :

ــ مين فيكو اللي طلع شرب البيض ورمي القشر ؟

فقال مراد في بساطة :

\_ أنا .

ــ تبقى حرامى .

ــــ لأ ما ابقاش حرامي ، أنا شربت نصيبي ، ولا يعني يطلع عاطف كل يوم يلهف البيض وحده .

فقالت زينب لتنهي الموضوع :

\_ أنا ح اجيب قفل للعشه .

ووضعت صينية على مائدة الصالة عليها عملب الجبن والزيتسون والحلاوة الطحينية ، ووضع إلى جوارها خبز فجاء الأولاد يأكلون . راح سامى يتناول إفطاره فى عجلة وهو واقف وفى يده كتاب يقرأ فيه فقالت له الأم :

\_ ما تقعد تاكل يا سامى ، واللا عايز الأكل ينزل فى رجليك ؟ فابتسم سامى ابتسامة خفيفة ساخرة ، ثم انصرف فقالت له الأم : \_ باقول لك اقعد مش باقول لك امشى .

وجاء عاطف وفی یده بیضة سلقها وراح یقشرها ، فلما انتهی منها خطفتها سوسن و دستها فی فمها فراح عاطف یصرخ ویبکی ، فجاء أبوه وقل له :

\_ بس بلاش عياط .

فاستمر عاطف يبكي ويشير إلى فم سوسن :

\_ البيضه .. البيضه ..

\_ طب اسكت وخد قرش .

فكف عاطف عن البكاء ومديده وقال:

\_ هات ،

وأخذ عاطف القرش واندفع خارجا ، وانصرف الجميع و لم يبق في الدار غير زينب فذهبت إلى الشرفة ووقفت ترقب شرفة جارتها ، فلما لمحتها حيتها ثم دار بينهما حوار ، قالت زينب :

- مش عارفه اعمل إيه ؟ ما باكلش وعماله اتخن .

\_ خسسى روحك .

\_ یا ریت! بس ازای ؟

ـــ فيه صابون بيخسس ..

ــــــ هو فين ده ؟

ـــ في بلاد بره ولسه ما جاش .

ــ يعني ح استني لما يبجي .

لأ ياختى ، فيه حبوب بتخسس فى شارع الشواربى بس غاليه
 موت .

ولم تنتظر . انسلت من الشرفة وانطلقت إلى شارع الشواربى . وعادت إلى البيت وراحت تخلع ملابس الخروج ، وإذا بجرس الباب يدق دقا مستمرا . إن إصبعا ضغطت على الزر و لم ترتفع عنه فصاحت في ضيق :

- طيب يا سوسن جايه .. جايه أهه .

وفتح الباب ودخلت سوسن فقالت لها أمها تنهرها :

- ميت مره قلت لك ما تحطيش إيدك ع الجرس على طول .

وعادت زينب تستأنف خلع ملابسها وإذا بالجرس يرن في رفق . . . .

فقالت زينب :

ـــ سوسن افتحي الباب ، بابا حه .

ودخل حسين فوجد زوجته لخلع ملابس الخروج فنظر فى دهشة وقال :

- \_ إنتي خرجتي ؟
- ... خرجت ادور على حبوب التخسيس .
  - \_ حبوب التخسيس ؟!
    - فقالت في عتاب:

\_\_ إنت ما سمعتش أم جلال قالت لى إيه ؟ عصاعيص النقريسه بتتمسخر على .. أنا .. أنا لازم اخس يا حسين .

ــ يا زينب اعقلي .

ــــ أنا اتفقت مع الراجل خلاص ، قلت له يحضر لى الحبوب عبال ما اجيب له الفلو س .

فقال في سخرية :

ـــ و كام الفلوس دى ؟

ــ الكورس بعشره جنيه .

فقال وهو يخلع كرافتته في غيظ :

ــــ وح تخدی کام کورس ؟

ـــ سته بس يا حسين .

\_ یعنی ح ادفع ستین جنیه عشان تخسی ، و یا تخسی یا متخسیش ! \* فقالت فی صوت فیه نحیب :

... يعنى مستخسر في ستين جنيه بعد العشره الطويله دى كلها ؟

\_ لأ مش مستخسرهم . . بس أجيبهم منين ؟

\_ استبدل لي جنيه من المعاش .. اشمعني استبدلت لأحلام .

وارتفع صوت حسين ، قال في انفعال :

\_\_أستبدل لك جنيه ؟ لما جوزت أحلام قلت فى الطلب إنى ح اجوز بنتى ، أقول إيه فى الطلب بتاعك ؟ أقول عايز استبدل جنيه عشان أخسس مراتى ؟!

ووصل صوت الأب إلى مسامع سوسن فجاءت ووقفت تسترق السمع ، سمعت أباها يقول :

\_ ده کلام فاضی .. دی قله عقل .

فقالت زينب وهي تبكي :

ــ ده جزائي .. دي آخر عشرتي معاك .

وتركت الغرفة غاضبة وقد تركت دموعها تسيل على خديها دون أن تحاول أن تكفكفها ، واندفعت كالعاصفة إلى غرفة البنات وأغلقت الباب خلفها في عنف .

ودخلت سوسن على أبيها وقالت له :

\_ إنت طلقتها خلاص ؟

فارتسمت ابتسامة كبيرة على وجه حسين.

جلست زينب ترفو جوارب أبنائها وتحاول أن تتبع الرواية التي كانت تجرى أحداثها على شاشة التلفزيون ؛ وجلست سوسن تتابع الفيلم باهتام ، وراح عاطف يقول في ضيق :

\_ ما تخلصونا بقى ح تفلقونا على إيه ؟ ما احنا عارفين فى الآخر تنجوزوا .

وقفت الأم عن رفو الجورب الذي في يدها وقالت :

\_ وطی حسك ، سامی ومراد بیذاكروا .

فقال تحاطف في صوت خافت :

ـــ ماما . هي كل الروايات لازم يتجوزوا في آخرها ؟

\_ مش كلها يا عاطف .

وجاء الأب يشارك أبناءه جلستهم ، فلما رأى سوسن أمام التلفزيون

قال لها :

\_ إنتي مش ح تذاكري يا سوسن ؟

فقالت دون أن تلتفت إليه :

\_ لما تخلص الرواية يا بابا .

(الحفيد)



ورن جرس الباب فقامت الأم وفتحته ، فألفت فتاة جميلة ترتدى بنطلونا طويلا وفوقه جاكت تدلت إلى ما تحت الركبة فنظرت إليها في إنكار ، فقالت الفتاة في ثبات :

ــ سامي موجود يا تانت ؟

فقالت الأم في عصبية :

ـــ مش موجود .

فنظرت الفتاة إليها في شيء من الدهشة وقالت لها:

ــ لما ييجي قولي له جيهان سألت عليك .

ودارت الفتاة على عقبيها وانصرفت وزينب تنظر إليها غير مصدقة ،

فلما هبطت الدرج أغلقت زينب الباب خلفها في نرفزة ودخلت تقول:

\_ بنات آخر زمن . جياله لغاية هنا برجليها .

وراحت تقلدها في مبالغة وهي تتماوج :

\_\_ سامى موجود يا تانت ؟ قال تانت قال ، إحنا ما كناش بنات ! ونهضت سوسن فقد سنحت لها فرصة نقل خبر ، وانطلقت إلى حيث كان سامى وقالت له :

\_ و احده جت سألت عليك ، ماما قالت لها مش موجود .

وألقى سامى الكتاب الذى كان فى يده فى غضب وخرج إلى حيث كانت أمه ، وسوسن خلفه مبتهجة تقفز من الفرح قفزا ، ترقب فى سرور ما ستسفر عنه المشادة المرتقبة ، وقف سامى أمام أمه وقال :

\_\_ حد سأل على ؟ .

فقالت أمه دون أن ترفع عينيها عن الجورب الذي كانت ترفوه :

ــ سامى ، أنا مش عايزه المسخره دى تحصل تانى .

\_ مسخرة إيه ؟

\_ إزاى مقصوفة الرقبة دى تيجى لغاية هنا تسأل عليك ؟ و لاحظ الأب أن سامى سينفجر في أمه فقال ليخمد النار المتأججة في

صدر ابنه:

\_ واحده اسمها جيهان سألت عليك .

ــ وما ندهتوليش ليه ؟

فقالت الأم في انفعال شديد:

ـــ هو اللي كان ناقص .

ـــ إيه هو اللي كان ناقص ؟ دى زميلتى فى الفصل زى ما نبيله لها زملاء رجاله فى الفصل .

فهبت الأم ثائرة كأنما تجرح كبرياءها وقالت :

\_ ما تقولش كده .. أنا بنتي مؤدبه ؟

ــ ومن قال إن جيهان مش مؤدبه ؟

\_ لو ماكانتشي بجحه ما كانت جت برجليها لغاية هنا .

\_ فيها إيه لما جت لغاية هنا ؟ هو ده مش بيت محترم ؟

وأحست زينب أنها ستهزم إذا ما استمر الحوار فالتفتت إلى زوجها وقالت :

\_ ما تشوف ابنك يا حسين!

فالتفت حسين إلى سامي وقال:

ـــ روح ذاكر يا سامي ، حصل خير .

فقال سامي وهو ينصرف :

ــ تكدبوا وتقولوا إن انا مش هنا وبعدين تقولوا حصل خير !

وغاب سامي في غرفته فقالت زينب لزوجها :

ـــوالله ما ح يخسرهم إلا تطريتك دى ، يا راجل خليك حمش مره . وكأنما لم يعجبه كلامها فانسحب إلى غرفة النوم ، فقامت زينب

خلفه وراحت تقول:

ــ أنا عايزه أعرف اللي بينه وبينها ؟

فقال حسين في هدوء :

\_\_ ح يكون بينه وبينها إيه ؟ زميلته فى الجامعه وبينه وبينها صداقة بريئة .

فقالت في غيظ وقد أخذت ثوبها عند صدرها بين أصابعها وراحت بهزه :

\_ بريه . بريه 1 قال صداقه بريته قال .. هو فيه في الدنيا دى صداقه بريته ؟!

\_ عيبك إنك دايما تسيئي الظن بالناس.

\_لأ ... نحط الكبريت جنب البنزين ونقول صداقه بريته ، يا راجل فوق بقى ، اسألنى أنا دا كله تحت باطى .. ح ييجى واد مفعوص زى ده ع الآخر و ياكل بعقلى حلاوه .

\_ اسمعى نصيحتى يا زينب ، إن جت سألت عليه مره تانيه قولي لها اتفضل .

فقالت ساخرة:

ـــ وادخلها على فين ؟ على أودة النوم ؟!

وأعرض عن قولها واستمر في حديثه قائلا:

\_ مش أحسن لما يتقابلوا قدامنا من إنهم يتقابلوا من ورانا ؟

\_ وایش عرّفك انهم مش ح يتقابلوا من قدامنا ومن ورانا .

\_ بلاش كلام فارخ ، إذا عرفوا إننا ينثق فيهم مش ح يكدبوا علينا .

فقالت في تهكم:

ـــــ اسم الله يا بنثق . فوق يا خويا فوق دا جيل يعلم به ربنا .

وخرجت إلى حيث كانت سوسن وعاطف وكانا يتابعان الفيلم .

فلما رأت سوسن أمها اتجهت إليها وقالت :

ــ ماما .. إزاى واحده ست تحبل من غير ما تتجوز ؟

فقالت زينب فى فزع :

ـــ اخرسي يا قليلة الأدب .

وأرادت سوسن أن تنفي عن نفسها ما أغصب أمها فقالت :

ــ أنا مالى ، التلفزيون اللي بيقول كده .

ونظر عاطف إلى سوسن وقال لها:

\_ سيبك من ماما ، تعالى أنا أفهمك .

فهبت زينب ثائرة واندفعت إلى حيث كان حسين وراحت تولول :

- يا خرابي .. يا خرابي .. جيل آخر زمن .

وضعت زينب الهدايا التي ستحملها إلى ابنتها نبيلة في كيس من البلاستيك . لقد زعمت أن ابنتها أوحشتها كثيرا وأقنعت زوجها أن يشترى شيكولاتة وأشياء أخرى فما يليق أن تدخل إلى ابنتها خاوية الدين . صدق الرجل أن ذهاب زينب إلى ابنتها إن هي إلا زيارة بربئة وما خطر له على قلب ما كان يدور في رأس الأم . . إنه كان يحب أن يذهب معها إلا أنه كان مضطرا إلى العودة إلى عمله بعد الظهر فنهاية السنة المالية على الأبواب ، وكان عليه أن يقفل حسابات السنة التي تجرى بخطوات واسعة لتصبح في ذمة التاريخ !

كان يتعجل خروج زينب ليخرج ، ولكن زينب من عادتها أن تتلكأ كثيرا قبل أن تغادر البيت . إنها تعيد ترتيب كل شيء ، تلتقط قصاصات الورق من الأرض ، وتبسط الستائر التي تكون قد جمعت ليدخسل النور ، وكانت دائما تعود إلى غرفة النوم بعد أن تصل إلى باب الخروج لتلتقط شيئا نسيته أو تتأكد من أنها أحكمت إغلاق بابها .

وفي أثناء هزها للستائر قال لها حسين :

\_ ح تروحي لوحدك ؟

فقال عاطف :

ـــ أنا ح اروح معاها .

فقال الأب:

\_ مش كنت خدت حد كبير ؟

فراح عاطف يفرد طوله ويشب على قدميه وقال:

ــ طب ما انا كبير اهو .. أنا بقيت راجل .

وابتسم حسين وقالت زينب لعاطف :

ــ ياللا يا راجل .

وفتحت زينب الباب لتخرج ، فقال حسين ساحرا :

ـــ ما نستيش حاجه ٢

فدارت زينب على عقبيها وقالت:

ـــ فكرتنى .. الجونتى .

وعادت تفتح بابغرفة النوم التي أغلقتها بالمفتاح ، واتجهت لتحضر القفاز وحسين في الصالة ينفخ ضيقا وعاطف يتململ في وقفته ، وعادت تحمل الكيس في يد والقفاز في اليد الأخرى وذهبت لتخرج ، ولكنها قبل أن تغادر الباب ثبتت طرف حذائها على الأرض ورفعت كعبه والتفتت تنظر إلى ساقها ثم قالت لزوجها :

- والنبي يا حسين شوف الشراب معدول .

ـــ معدول یا ستی .

ولما اطمأنت إلى حسن هندامها تحركت ، فقال لها حسين :

\_ خدو تاكسى .

فقالت في براءة:

\_ والأتوبيس ماله .. ليه البعزقهاللي ما لهاش لازمه ؟ ما كل الناس بتركب الأتوبيس .

وخرجت زينب وعاطف إلى جوارها مزهوا بنفسه ، وراح حسين يتبعهما بنظره ، وقد كست وجهه موجة إشفاق وسخرية ، إشفاق على نفسه وسخرية من زوجته العاقلة المديرة !

واندست زينب فى الأتوبيس وانحشرت بين الواقفين وأوقفت عاطف أمامها ، إنه يتنفس بصعوبة من الزحام الذى يضغطه ضغطا . . وأحست زينب بشاب يتحرك خلفها فالتفتت إليه فلم ترتح إلى هيئته ، فراحت تنقل عاطف من أمامها إلى خلفها و لم يكن ذلك أمرا ميسورا . وأصبح أمامها رجل يرتدى ملابس رياضية وقد أمسك العمود الذى تعلق به الواقفون بيد يزين معصمها ساعة ذهبية .

ورأت يدالشاب الذي كان خلفها تتحرك في خفة وفي حركة خاطفة تخلع الساعة من الرجل الواقف أمامها فصاحت صيحة لا إرادية :

\_ الساعه ..

فالتفت الرجل الذى سرقت منه الساعة فى سرعة وقبض على يد النشال وفى يده الساعة الذهبية ، وقال له فى وعيد :

ــآه يا حرامي !

وراح النشال يستعطف الرجل:

- \_ خلاص يا بيه .. ساعتك معاك .. أنا غلبان وعندي عيال .
  - ... أنا عارف ألاعيبكم ، عارف كل طرق النشل بتاعتكم .
- ـــ خلاص يا بيه .. ح تاخد إيه من حبسى ؟ . ح تجوع عيالى .. سيبنى الله يسترك .

فقال الرجل هازئا به:

- ــ مش ح اسيبك إلا لما توريني نشلتها ازاي من أيدي .
  - ــ أمرك يا بيه .. ارفع إيدك زى ما كنت رافعها .

ورفع الرجل يده وأمسك بقبضته العمود الأفقى الذى يتعلق به الواقفون ، وفى خفة خاطفة نشل النشال الساعة وقال وهو يقفز من الأتوبيس :

\_ نشلتها كدا هوه .

وأطلق النشال ساقيه الريح وانفجر ركاب الأتوبيس يضحكون ، والرجل الناصح غارق في الخجل .

ودخلت زينب وعاطف على نبيلة ، فوضعت زينب الكـيس البلاستيك الذى ملىء بالهدايا على أول منضدة قابلتها ، وراحت تقبل ابنها التى قادتها إلى غرفة الاستقبال وزينب تقول :

\_\_ نقعد هنا يا نبيلة ، هو احنا غرب ؟

وجلستا تتحدثان ، وفيما هما تتحاوران قالت الأم :

\_ ما جبتيشي لنا حاجه حلوه كده زي أحلام ؟

فقالت نبيلة في بساطة:

ـــ لا ً .. أنا متفقه مع شفيق إننا ما نخلفش إلا لما اخلص الجامعه .

ـــ وليه بقى يا بنتى ؟ ما فى الجامعه ستات كتير مخلفه .

ــ بيقول لى تروحي الجامعه إزاى وبطنك علو كده .

وتشير بيدها إشارة فيها مبالغة :

ـــ ما ستات كتير بتروح الجامعه وبطنها علو كده .

فقالت نبيلة في إنكار:

ـــ أروح الجامعه كده ازاى ؟

ـــ يا بنتى البكريه بطنها ما بتبنشى ، وفى الشهور الأخيره البسى هدوم واسعه .

ب. دا شفيق يقول لى تعملى إيه لو ولدتى فى الامتحان واللا قبل
 الامتحان بجمعه ؟

\_\_ یا ختی دی تلاکیك ، یعنی كان منشن علی الامتحان ؟ دا بس هو مش عایز یر تبط بحاجه ، عایز یفضل حر . إن ما ربطهش بعیل مین عارف یمکن یطیر .

ـــ يا ماما شفيق مش من دول .

\_ كلهم يا بنتي من دول .. اسأليني أنا ، أمال أنا خلفت سبعه ليه ؟ \_ سبعه يا ماما ؟ الأيام دي راحت خلاص .. مين في اليومين دول

بقدر على سبعه ؟ يجيب لهم صحه منين ؟ يجيب لهم فلوس منين ؟ \_\_\_الصحه ربنا بيديها على قد ما بيدى العيال . . و اغلبيه بالعيال يغلبك

بالمال .

- \_ كفايه يا نماما واحد واللا اتنين .
- \_ دا الكلام الفارغ اللي بيعلموه لكم اليومين دول .
  - \_ مش كلام فارغ يا ماما . كفايه واحد .
- ـــ بس هاتى الأولانى وانت نفسك ح تنفتح لهم ، ح تدوق لذتهم . وراح عاطف يأكل الشيكولاتة التي قدمتها له أخته ، إنه لم يكتف

بقطعة أو قطعتين ، لقد ذاق لذتها فانفتحت لها نفسه . و نهضت الأم لتنصرف فقالت لها نبيلة :

- ... ما بدرى يا ماما .
- \_ نروح قبل الدنيا ما تضلم علينا .
- \_ استنى شويه زمان شفيق جاي يوصلكم .
  - تفتح حقبية يدها وتبحث فيها ثم تقول:
    - \_ نسيت المشط.
    - فتلتفت نبيلة إلى عاطف وتقول له:
  - \_ هات يا عاطف المشط من أودة النوم .

يدخل عاطف غرفة النوم ويتجه إلى التواليت فلا يجد المشط ، يفتح الدرج فيجد مشطا ويجد في الدرج مانع للحمل ، يتناول المشط ويدسه في جيبه ، ثم يأخذ مانع الحمل وينفخه ويخرج إلى حيث كانت أمه ونبيلة وقد امتلاً العازل بالهواء وأصبح في حجم الباذنجانة السوداء الطويلة . ورأت نبيلة ما يفعله أخوها فهرولت إليه وخطفت منه العازل في شدة ورأت الأم ما فعلته نبيلة دون أن تفطن إلى الدافع لها على ذلك فقالت في

عتاب:

\_ مالك خضيتي الولد كده على حتت زمارة ؟

وفتح الباب ودخل شفيق ، فتنفست نبيلة الصعداء وقالت :

\_ أهو شفيق جه . . اقعدى معاه شويه يا ماما .

\_ معلهش يا بنتي مره تانيه .. اتأخرنا .

\_ طب شفيق يوصلكم .

فقال شفيق في رقة :

\_ اتفضلوا ..

وركبت زينب في المقعد الخلفي للسيارة وجلس عاطف إلى جوار شفيق وانطلقت السيارة ، فاذا بعاطف يلحظ أن في مؤخرة السيارة التي أمامهم لوحة كتب فيها ( . E . T ) فقال لشفيق وهو يشير إلى اللوحة .

ـــ يعنى إيه ( . E .T ) يا أنكل ؟

\_ يعنى اوعى تتشعبط .

وضحكت زينب ونظر إليه عاطف عاتبا ، فلما وصلوا هبطت زينب وهي تقول :

\_ اطلع يا شفيق ما يصحش عمك فوق.

فقال شفيق معتذرا:

\_ مره تانيه يا تانت .. عندى شغل كتير الليله دى .

وعاد ليجد نبيلة في الفراش تنتظره ، فراح يخلع ملابسه ثم اتجه يحضر مانع الحمل ، فلم يجده فلما سألها عليه قالت له وهي تضحك : \_ اسكت مش عاطف عتر فيه وافتكره زماره .

فالتفت إليها وقال :

\_ طب خدتی الحبایه ؟

فقالت في تخاذل:

\_ خدتها .

وأحس في لهجتها عدم الصدق ، فأعاد النظر إلى ورقة الحبوب وراح يعدها ثم قال :

\_ أنا شايف إن عدد الحبوب ما نقصى .

فمدت له ذراعين بضتين عاريتين وقالت في إغراء :

\_ تعال ..

فهرع إليها يرتمي في أحضانها .



كانت زينب تغدو وتروح في قلق ، وكان حسين يذهب إلى الشرفة وينظر وتطول مراقبته للطريق ثم يعود ليدور في حجرات المنزل . ونظرت زينب إلى الساعة المعلقة في الصالة فإذا بها تستشعر أن دقات قلبها تعلو على صوت البندول . و لم تستطع أن تستقر فانطلقت إلى حيث كان زوجها وقالت له :

... الساعه بقت تسعه يا حسين ومراد مجاشي من المدرسه .

فخرج سامي من غرفته وقال:

ــ دلوقتی بیجی ح یروح فین ؟

فقالت زينب في صوت مخنوق:

ــدا ما تغداشي يا عيني .

فقال حسين ليطمئن نفسه:

... تلاقیه اتغدی مع حد من صحابه.

دا ما تعودش يتأخر لغاية الساعه دى .. لو كان راح يلعب كوره كان زمانه جه . ما فيش الا إنه ركب بسكلته وهفه أتو مبيل .

وفزع حسين وقال لها :

\_ یا شیخه افتکری حاجه عدله ، هو انتی ما تفکریشی فی خیر بدا ؟

فقالت زينب مولولة:

\_ ح ييجي الخير منين والواد بره لغاية دلوقت .

وأراد حسين أن يفر من تشاؤمها فذهب إلى الشرفة وراح يطل على الطريق وهو قلق ، وطالت وقفته فقلقه أهون من ذلك الوخز الذي بخز روحه كلما تحرك لسان زوجه بالشر .

وراحت الهواجس تعبث به فرأى أن يفر منها إلى زوجته . فدخل فإذا به يسمع زينب تقول لسامي :

ـــروح يا سامي شوف أخوك فين ؟

فقال سامي في ضجر:

\_ أدور عليه فين ؟ في مصر كلها !

فقالت زينب في توسل:

ـــ شوفه عند حد من صحابه یا حبیبی .

فقال سامي وهو يولي أمه ظهره :

\_ هو دا له صاحب واللا اتنين ؟ دى المدرسه كلها صحابه .

وإذا بعاطف يأتى ويتوسط الصالة وهو يقول :

ــ والمدرسين كان ، دا قال ..

ولم تدعه أمه يتم حديثه بل دفعته وهي تقول :

ــ والنبي تغور من وشي دلوقت .

ورأت حسين مقبلا من الشرفة فهرعت إليه وقالت :

وظهر فى وجه حسين الذعر وخفق قلبه فى فزع وقال فى ضيق : ــــ ما تفتكرى خير .

فقالت وقد اختنق صوتها بدموع تود أن تنسكب على خدها : \_ أمال يعني ح يكون فين لغاية دلوقت .

و دخلت سوسن إلى الشرفة ثم عادت تقفز فرحا:

ــ مراد جه .. مراد جه ..

وارتمى الأب على مقعد قريب واستنشق نفسا طويلا ثم زفره فى راحة ، وإذا بزينب تقترب منه وتقول له :

\_ لما يطلع اشخط فيه ، خوفه مره ، بلاش التطريه دي .

فقال حسين وقد تبخر قلقه ورد إليه طبعه الهادئ :

ـــ مش لما نشوف كان فين ؟

و فتحت سوسن باب الشقة وأسرع عاطف ليستقبل أخاه في منتصف السلم ، فلما قابله قال له متوعدا :

ـــ دى ماما ناويالك نيه .

وصعد مراد صامتا ، فلما وصل أمام الشقة استقبلته سوسن وقالت له وقد وضعت يديها فى وسطها وهزت نصفها العلوى يمينا وشمالا : ــــ كنت فين يا اخويا لغاية دلوقت ، دى ليلتك مش فايته .

(الحفيد)

وأطلت زينب من الباب ومدت يدها وقبضت عليه وجذبته حتى أسمى فى منتصف الصالة وقالت له :

- داير على حل شعرك ، مالكش أهل تقول لهم رايح فين ؟ الساعه بقت عشره ؟ بقينا نص الليل وانت في الشارع من طلعة النهار .

وأطرق مراد و لم ينبس بكلمة وإن كانت أمه تلكزه في صدره لتنفس عن الغيظ الذي كاد ينثرها أشلاء ، ونهض حسين وقال لابنه في رقة : ــــ كنت فين لغاية دلوقت يا مراد ؟

فقال مراد وهو يستشعر أسي لأنه سبب لأهله كل ذلك القلق :

ســ واحد صاحبی معاه عربیه قال لی تعال معایا نروح القناطر نجیب حاجه من بیتنا ، قلت له أنا ما قلتش انی ح اتأخر ، قال لی مش ح نتأخر ، ورحت معاه ، واحنا راجعین انقطع سیر العربیه ما قدرناش نرجع إلا لما اشترینا سیر تانی .

فقالت له أمه :

ـــ لما انقطع السير ما سبتوشي ورجعت ليه ؟

ــــما كانش معايا فلوس ، وإن كان معايا فلوس ما كنتش ح اسيبه ، احنا خرجنا سوا لازم نرجع سوا .

فلكزته أمه في صدره وقالت:

\_\_ شهم قوى .

وأراد حسين أن يضع حدا لهذه المشادة فقال:

\_ طالع لامه .

ونظرت إليهم نظرة فيها سخرية وقالت :

ـــ والله انتوا بتلعبوا .

وقال سامي في ضجر:

\_ عايزين نتعشى عشان نذاكر .

فقالت زينب وهي ترمي مراد بنظرة غاضبة :

ــ البركة في اخوك اللي سد نفسنا .

وذهبت تعد لهم العشاء ودخل مراد يبدل ثيابه ، وتذكر حقيقة ما كان .. إنه كان مع زميل من زملاء المدرسة حقا وركب معه سيارته حقا وانطلقا إلى القناطر حقا . كان صادقا في كل ذلك ، أما الشيء الذي أخفاه فهو أن إلى جوار صديقه كانت فتاة ، وإلى جواره في المقعد الخلفي فتاة أخرى ، وقد قطع شيء حقا و لم يكن ذلك الشيء سير المروحة بل حمالة قميص الفتاة التي كانت تجلس في المقعد الأمامي إلى جوار صديقه ! ودق جرس الباب فذهب حسين وفتحه ، فإذا بجيهان أمامه تسأله :

ـــ سامي موجود يا أنكل ؟

فقال حسين وهو يفسح لها طريقا :

ـــ أيوه يا بنتي اتفضلي .

ودخلت جيهان في خطوات ثابتة ، وراح عاطف وسوسن ينظران إليها في فضول وسرعان ما جرت سوسن إلى حيث كان سامي ، وقالت جيهان :



\_ أنا ما رحتش الكليه النهارده ، جيت آخد نوت محاضرات سامي عشان انقل المحاضرات اللي فاتتني .

فقال لها حسين في هدوء:

ــ اتفضلي يا بنتي ، سامي جوه .

ووقفت جيهان مترددة فقال حسين لعاطف :

ــ وصلها يا عاطف .

ووصلت الأصوات إلى مسامع زينب فخرجت تنظر فإذا بها تجد سامى وجيهان يتقابلان عند باب حجرته ، فارتسمت على وجهها دهشة وزادت دهشتها لما رأتهما يدخلان الغرفة ، ونظرت إلى زوجها في إنكار فإذا به يرد عليها بكل ملامحه وحركات يده ليقول لها : وفيها إيه ؟! ووقع بصرها على عاطف فراحت تشير له أن يدخل معهما ، فسوسن قد عادت لتجلس أمام التلفزيون . وأطاع عاطف أمه فدخل ، وشمت زينب رائحة شيء يحترق فهرعت إلى المطبخ وأنزلت البيض الذي صار ف لون الفحم ، ثم عادت لتتابع ذلك العبث الذي يجرى تحت بصرها وسمعها .

وخرجت جیهان وإلى جوارها سامى وخلفهما عاطف ، كانت جیهان تحمل نوت المحاضرات التى اقترضتها ، ومدت یدها تصافح سامى و تقول له :

ــ متشكره .

وسارت حتى إذا ما وصلت إلى حيث كان حسين قالت له :

ــ مساء الخير يا عمى .

فقال لها حسين في صدق:

ــ ما بدري يا بنتي ، استريحي م السلم .

ــ مره تانیه یا عمی ، بابا مستنی تحت .

فقال حسين :

ـــ ما يصحش ، انزل يا سامي وقول له يتفضل .

وتحرك سامي فإذا بجيهان تمنعه وتقول :

\_ ما تتعبش نفسك ، مش ح يطلع .

ـــ ليه يا بنتي ؟

\_\_ أصل بابا بينكسف .

ولمحت جيهان زينب وقالت لها:

\_\_ مساء الحير يا تانت .

ووسعت جيهان خطوها والدسرفت لا تلوى على شيء ، وارتمت زينب متهالكة على مقعد قريب وقالت :

\_ لو كان ينكسف ما كانشي جاب أم وش عريان دى .

جلست أحلام تستشعر غبطة فى أعماقها . كانت سعيدة لأنها على وشك أن تحقق رسالة كل أنثى فى الحياة ، وكان جلال مزهوا برجولته رافعا رأسه لكأنما كان أول رجل أنجب ، وكانت زينب متهللة بالفرح فلو أنها قد جاءت بسبعة أبناء إلا أن سرورها بأن ابنتها ستصبح أما كان يفوق كل سرور ملاها .

ورنت زينب إلى ابنتها في حب وقالت :

ـــ إزيك دلوقت يا أحلام ؟

فقالت أحلام :

ــ لسه راجعين من عند الدكتور ، قال لي عندك شوية زلال .

وبسطت أحلام ساقها لترى أمها أن بها بعض الورم .

فقالت الأم وهي تشوح بيدها مستنكرة :

ـــ دكتور ؟ دكتور إيه ، أنا خلفتكم كلكم ما رحتش ولا مره لدكتور .

فقال جلال:

ـــ وقال لها لازم تمشى كل يوم .

\_ تمشى يا خويا ما تمشيش ليه ؟ دانا رجعت م الغوريه وبعدها بنص ساعة ولدت أحلام .

فقال جلال مداعبا:

ـــ وكنتي بتعملي إيه في الغوريه يا تانت ؟

فقالت زينب وقد أشرق وجهها للذكريات:

\_ كنت باشترى مغات .. هو يرم عضم الوالده إلا المغات ! وكأنما كرهت أحلام ألا تكون محور الحديث فقالت وهي تنظر إلى جلال في حب :

\_ جلال يا ماما اتفق مع الدكتور على كل حاجه ، قال لى الدكتور



أول ما تحسى بوجع تيجي ع المستشفى على طول .

فقالت زينب في فزع:

\_\_ مستشفى ؟ مستشفى إيه يا بنى ، ده احنا عمرنا ما دخلنا مستشفى ، طول عمرنا بنولد فى البيت .

فقال جلال في هدوء:

\_ الدنيا اتنورت يا تانت .

ولم يعجب ذلك زينب فقالت :

ـــ اتنورت إيه يا جلال ؟ ده محن ستات .

وارتفع صوت التليفزيون حتى كاد يغطى على حديث الولادة ، فصاحت زينب في غضب :

ـــ بت يا سوسن ! ح توطى صوت التليفزيون ده واللاح اقوم اطفيه لك ؟

وأسرعت سوسن وخفضت الصوت ، فعاد جلال يقول :

\_ في المستشفى يا تانت استعدادات .

\_ استعدادات ليه ؟ يا بنى الولاده فيها حاجه ؟ أنا لما ولدت عاطف قمت بعدها على طول وغسلت كوم غسيل قد كده وطبخت العشا ، واللا كنت ح اسيبهم من غير عشا ؟

\_ ما كانش البكرى يا تانت .

فالتفتت إلى ابنتها وقالت :

\_ والله ما ولدت ولاده أسهل من ولادة أحلام ؛ الفلوس اللي ح

نحطها في المستشفى نعمل بيهم سبوع نفرح ونفرّح الجيران.

... ما تولد في المستشفى ونعمل السبوع برضه .

و لم يعجب زينب رأيه فقالت :

\_ أنا واحده صاحبتي ولدت في المستشفى ، أول ما شافت ابنها عضته في كفه ، والعجيبه إن تاني يوم جابوه لها هو بعينه .

فقال جلال معقبا على زوجه :

\_ و إيه العجيبه في كده ؟

فقالت أحلام لتجد مبررا للولادة في بيت أمها :

ــ بيقولوا الأولاد بتتبدل في بعض .

وأسرعت زينب تشد أزر ابنتها قالت:

\_ أنا ما طقشي ضنايا يبعد عن عيني ثانيه .

ودخل عاطف ورأى أمه قدمت بعض الحلوى لأخته وزوجها فمد يده نيتناول منها ، فإذا بأمه تقول له :

\_\_ عبب يا عاطف .

فقال جلال وهو يقدم قطعة حلوى إلى عاطف :

ــ سبيه يا تانت .

فقالت زينب وهي ترمي ابنها بنظرة شزراء :

ــ بعدين ياخد على كده .

ــ ما فيش حد غريب .

ــ ما الخوف ليعمل كده قدام الغرب .

و قالت لعاطف:

... امشى العب تحت .

فقال عاطف :

\_ طب هاتی قرش .

وأخذ القرش ومر إلى جوار سوسن وهي تتبع الإعلانات في التلفزيون فرماها بنظرة هازئة ، ثم اتجه إلى الباب وما إن فتحه حتى ارتطم بأبيه فقال له أمه ه :

\_ بتجرى كده على فين ؟

فقال في فرح من قام بمعجزة :

\_ رایح اضیع ، خدت منها قرش .

ودخل أبوه فلما لمح أحلام وجلال صاح مرحبا:

\_ أهلا جلال ، أهلا أحلام .

وجلس وظهر على جلال الارتياح ورأى أن يشركه في الحديث ،

كان واثقا من أن حماه سيقف إلى جواره ولن يخذله قال :

\_ كنا بنتكلم في موضوع ولادة أحلام ، أنا رأبي انها تولد قي المستشفى ورأى تانت إنها تولد هنا .

فقال حسين في بساطة:

\_ أنا ماليش رأى ، الرأى لأحلام .

وكأنما وجدت أحلام أنها تستطيع أن تفصح عن رغبتها دون أن يثور زوجها ما دامت في حمى والديها فقالت : ــ أنا عمري ما دخلت مستشفى .

فقالت زينب كأنما تبعد عن ابنتها مكروها:


ــ ولا عمرك ح تدخوليها يا بنتي إن شاء الله .

والتفتت إلى جلال وقالت له :

ـــ خلاص ح تولد هنا .

وأسقط فى يد جلال ونظر إلى حماه فى عتاب ؛ وأحس حسين أنه يقول له دون أن ينطق حرفا : « ليه خذلتنى ؟ » فأطرق حسين وتحاشى أن تلتقى عيناه بعينى زوج ابنته .

واستأذن جلال ونهض فنهضت أحلام ، وانصرفا والأم تودعهما



ودخل الأب يخلع ملابسه . وفى أثناء عودة زينب مرت بسوسن فإذا بسوسن تعترض طريقها وتقول لها :

\_ ماما . . أنا عايزه استعمل اللولب .

فلكزتها أمها في صدرها ثم وضعت يدها على فمها وقالت لها :

\_ ح اقطع لسانك .

فقالت سوسن في براءة:

\_ وانا مالى ، ما التلفزيون بيقول استعملوا اللولب .

\_\_ قطيعه تقطعك وتقطع التلفزيون . لمى لسانك قبل ما اهرسك برجليه .

و لم تخف سوسن و لم تدخل لسانها في حلقها ، كان هناك شيئا تريد أن تعرف فقالت في هدوء :

\_ يعنى إيه اللولب يا ماما ؟

وراحت زينب تتلفت فى حيرة ، إنها تحس أنها وقعت فى فخ فلم تجد لها منفذا إلا أن تنهر ابنتها ، فقالت لها :

\_ يعنى اتكتمى بقى وريحيني من غلبتك دى .

دق جرس الباب فهرعت سوسن تفتح فإذا بسامي وجيهان يدخلان وإذا بدهشة عريضة ترتسم على وجه الأم ، وقالت جيهان في هدوء : - مساء الخم .

فقال حسين دون أن يظهر في وجهه أي انفعال :

ـــ مساء النور .

ورمقته زينب في استغراب كيف أن ما يراه لا يثير غضبه ولا يجعل الدم يفور في عروقه ؟ إنها همت بأن تعترض على ابنها الذي خدش حرمة البيت الذي كان في قدسية الجوامع قبل أن يدنسه الجيل الجديد بتصرفاته الوقحة الحمقاء ، إلا أن حسين نظر إليها نظرة حازمة شلتها عن كل حركة وإن لم تخمد النار المتلظية في أحشائها ، وقال سامي قبل أن يدخل غرفته خلف جهان :

ــ اعملي لنا شاي والنبي يا ماما .

وكاد ذلك يفجر ثورتها وإذا بحسين يقول في حزم :

ــ اعملي لهم شاي يا زينب .

وفطنت الأم بغريزتها إلى أنها إذا ثارت فسيقف الأب إلى جوار ابنه ،

فرأت أن خير ما تفعله ألا تثير زوبعة في غير أوانها وأن ترصد الريح حتى إذا ما كانت معها أثارتها عاصفة لا تهدأ حتى تقتلع ذلك الخطر الذي يهدد أمن بيتها .

والتفتت إلى مراد وقالت له :

\_ اعمل لهم الشاي .

ودارت على عقبيها لتنسحب بعيدا لتعبر · ن استيائها ، وقبل أن تغيب في حجرتها قالت :

ــ ادخل يا مراد ذاكر معاهم .

ورفت بسمة هادئة على وجه حسين وأراد أن يلحق بزوجته يحاورها ، فقال لسوسن وعاطف اللذين كانا جالسين أمام التلفزيون : هـ مش كفايه بقى وروحوا ذاكروا .. أفتكر لو امتحنوكوا في برنامج

التلفزيون تاخدوا عشره من عشره .

فقالت سوسن :

ــ والنبي ح اذاكر يا بابا لما تخلص الروايه دي .

وانسحب حسين وذهب إلى حيث زوجته فألفاها تضع يدها على خدها فقال لها :

\_ مالك ؟

ـــ عاجبك اللي حصل ده ؟ عاجبك يجيمها لغاية هنا واحنا قاعدين نتفرج ؟

ــ ما هي معاه طول النهار في الجامعه .

فقالت وإن أحست أن منطقها قد يهتز :

\_ هناك ناس كتير .

\_ وهنا أهم تحت عنينا والباب مفتوح .

\_ بس اشمعني البت دى ؟

ـــ زميلته ، فيها إيه لما اتنين يذاكروا مع بعض .

ـــ وليه ما تذاكرش مع بنت زيها وهو يذاكر مع ولد زيه ؟

ــ وفيها إيه لو ذاكرت بنت وولد ؟

فقالت وقد نهضت غاضبة :

۔ یا ناری ، فیہا کتیر یا سی حسین ، فیہا کتیر قوی واللا انت نسیت ؟

ولمعت عيناه ووأد بسمة أرادت أن تولد على شفتيه . فقد كان يلذ له الحوار الذى يدور بينهما وإن أصابه بعض رذاذ لسانها . وراحت تغدو وتروح فى غضب ، ووقفت فجأة فقد أنارت فكرة فى ذهنها فقالت :

ـــ ما هى نبيلة فى الجامعه ، تقبل إن نبيله تذاكر مع زميل لها فى بيته أو فى بيتها ؟

فقال ببرود :

ــ الموضوع ده ما بقاش يخصني ..

ولم تحتمل ذلك القول فقالت في غضب:

\_ أمال يخص مين ؟

و لم يخرجه غضبها عن هدوئه قال :

\_ يخص شفيق .

ولمحت سامى يخرج بصينية الشاى ويذهب بها إلى المطبخ ثم يعود ويغلق الباب خلفه ، فدارت على عقبيها وقالت حانقة :

ــ أهو الباب اتقفل يا سي حسين ، أنا ما اطقشي كده .

وذهبت وفتحت الباب وإذا بسامي وجيهان منهمكين في المذاكرة ، فر فع سامي رأسه وقال في صدق :

\_\_ اقفلى الباب من فضلك يا ماما ، صوت التلفزيون بيشوش علينا . و لم تجد مفرا من إغلاق الباب فإذا بها تغلقه في هدوء وإن لاح في وجهها الضيق وارتسمت فيه الهزيمة ، ودارت على عقبها فألفت حسين واقفا يرقبها ، فلما رآها حانقة تغادر المكان منكسرة ارتسمت على شفتيه بسمة عريضة .

وعاد الزوجان إلى غرفتهما ، وأراد حسين أن يحول الحديث إلى ناحية أخرى فقال وهو يفحصها بعينيه :

\_ يعنى خلصتي الكورس ولا خستيشي .

وأخذت ، لم تكن تنتظر أن يحاسبها زوجها أو يثير مرة أخرى ذلك الموضوع فارتبكت وقالت :

\_ لأخست .

\_ مش باین علیکی .

فقالت وهي تتحاشي نظراته:

... خسيت أتنين كيلو.

(الحفيد)

ــ يعنى استبدلت جنيه من معاشى عشان تخسى اتنين كيلو ؟! ورأت أن خير ما تفعله أن تتملقه .. إنها أنفقت ستين جنيها دون جدوى ، أرغمته بدموعها على أن يستبدل من معاشه جنيها فقالت وهى تدنو منه و تداعيه :

\_ أخس ازاي وانت مهنيني ومريحني على الآخر ؟

ولم يشأ أن يقسو عليها أكثر من ذلك فقال لها :

ــ فداكى مش ستين فداكى ستمايه .

وأثلج ذلك صدرها وأطمعها فيه فقالت له :

ـــ أنا مهدود حيلي طول النهار ، والنبي يا حسين تروح تغسل فناجين الشاى اللي خرجت من عند ابنك .

واستراح خسين . إنه استطاع أن يكبح جماح ثورتها بل روصها وجعلها تقبل الأمر الواقع . فإن كان سيغسل فناجيل الشاى فدلك أهون من تعب نفسه وتحطيم أعصابه ، ونهض وسار إلى المطبخ وراح يغسل ما في الحوض إذا بسوسن تقبل وتقول له :

ـــ عايزين ناكل .

\_ تاكلوا إيه ؟

ــ ناكل بيض.

وانهمك فى إعداد العشاء ثم حمله إلى غرفة الطعام ونادى أولاده ، وجاءت زينب فقال لها وهو يرمق الغرفة التي فيها سامي وجيهان :

ــ مش ندخل لهم عشا ؟

فقالت في امتعاض:

ـــ يا خويا .

و لم يشأ أن يوقظ الفتنة النائمة فسكت وراحوا يأكلون حتى إذا ما أتوا على ما أمامهم التفتت سوسن إلى أمها وقالت :

\_ ح نحلی إیه ؟

وهرعت إلى حيث العلبة وفتحتها فإذا بها تجد فيها قطعة شيكولاتة وقطعة ملبن ، فأخذت لنفسها الشيكولاتة وقدمت الملبن لعاطف وهي تقول لمراد .

\_ مش الملين أحسن من الشيكو لاتة ؟

فقال مراد في خبث:

\_ ما اقدرش اقول إلا لما أدوق.

وقدمت سوسن إليه الشيكولاتة فقضم قضمة وقدم إليه عاطف الملبن فقضم قضمة ثم قال :

\_ الاتنين حلوين ، ما وحش إلا قلتهم .

وغادروا غرفة الطعام إلى الصالة فإذا بالباب المغلق يفتح وتخرج منه جيهان ومن ورائها سامي ، والتفتت جيهان إلى سامي وقالت :

... أنا ذاكرت عندك النهارده ، انت تذاكر عندى بكره بقى .

وحيت من في الصالة ثم انصرفت وسامي معها ليوصلها ، وما أن أعلق الباب خلفهما حتى قالت الأم في سخرية :

ــ تعال يا ابويا شوف ، قال كان يسود عيشتي إن عرف إني فتحت

شباك ، قال شباك قال ..

وقال عاطف معجبا بذكائه:

\_ مش مذاكرة سامي مع جيهان ح تنتهي بالجواز .

فقالت له الأم غاضبة:

\_ إيه الكلام الفارغ اللي بتقوله ده ؟

و لم يعجبه أن تعترض أمه على قوله وأن تنهره فقال :

ــ مش كل روايات السينها تنتهي بالجواز .

كانت سيارة تنطلق وقد جلس شفيق خلف عجلة القيادة وإلى جواره نبيلة ، وجلس جلال فى المقعد الخلفى وإلى جواره أحلام . كانت السعادة ترفرف على الجميع وكان الحديث بينهم يسرى رخاء كالنسيم وإذا بالسيارة تهتز فى عنف . لم يكن الطريق ممهدا إذ كانت به حفر من أثر مد مواسير أو من أثر شيء آخر ، فالظاهر أن رجال المرافق ينقبون فى جوف القاهرة عن كنز دفين .

وارتفع جلال في الهواء ، ولما استقر مرة أخرى على مقعده قال وهو ينظر إلى بطن أحلام :

ــ حاسب على الولد .

ـــ وإيش عرفك إنه ولد ؟

فقالت نبيلة مداعبة :

\_ أحلام ح تجيب بنت و بنت و بعدين ولد زى ماما . . دايما البكريه تجيب زى امها .

فالتفت شفيق إلى زوجته وقال:

\_ تلاته مره واحده ، حديقدر يصرف على تلاته في اليومين دول ؟

فقالت أحلام فهي معجبة دائما بأبيها:

\_ أمال بابا يعمل إيه ؟

فقال شفيق في حماس:

\_ باباكي ده يستحق تمثال .

فقال جلال:

ــ عاش ليكو حرم نفسه من كل شيء وما حرمكوش من حاجه .

فقاطعه شفيق :

\_ لأيا عم أنا عايز أعيش لنفسى .

فقالت أحلام في إنكار:

\_ یعنی مش ح تخلف ؟

فوضع ذراعه خلف نبيلة في حب وقال :

ـــ أنا متفق أنا ومراتى إننا ما نجبش عيال قبل ما تخلص الجامعه ، يعني

لسه قدامنا تلات سنين كان .

فقال جلال:

ــ الكلام ده إن شدت حيلها ومشيت على طول .

فقال أحلام:

ــ طول عمر نبيله واخده بالها من نفسها ، مش عايزه تروح الجامعه

وبطنها سابقاها .

فقال جلال:

ــ مش شايف إن فيها حاجه انها ترو ن حامل وتروح الجامعه .

فقال شفيق :

\_ فيها حاجه بالنسبه لي أنا .

فقال جلال :

\_ فيها إيه ؟

\_\_إن جبت عيل يبقى لازم أبيع العربية على طول ، ما اقدرش ساعتها أصرف على بيتين . . العيل والعربيه . . وانا العربيه أحسن لى دلوقت . وكانت السيارة قد وصلت إلى مكان هادئ من كورنيش النيل فوقف شفيق ونزل من السيارة وفتح الباب الخلفى ، فنزلت أحلام ثم جلال ، وكانت نبيلة قد نزلت ووقفت تنتظرهما فلما أصبحوا جميعا على الرصيف قال جلال لأحلام وأختها :

\_ ح تتمشوا قد إيه ؟

فقالت أحلام:

ــ نص ساعه .

\_ طب احنا ح نستني هنا .

وراحت أحلام ونبيلة تمشيان الهوينا على كورنيش النيل . كانت الشمس تنحدر للغروب فكان المنظر شاعريا أخاذا يعكس ما فى الطبيعة من جمال على النفوس فأخذت أحلام ونبيلة تتسامران ، وطفق شفيق وجلال يتحاوران ؛ كان شفيق يحسد جلال على أخذه للأمور فى بساطة ويتمنى لو يستطيع أن يكون مثله راضيا ولكنه قلق على الدوام يحس أن بينه وبين الدنيا خصاما .

وقبل أن يمر الوقت الذي حدداه عادت أحلام ونبيلة والعرق يتصبب من نبيلة وقد بدا عليها الإرهاق ، فهرع إليها شفيق وقال :

ـــ مالك ؟

فقالت أحلام:

\_ يا دوب مشينا شويه لقيتها داخت ، قعدتها لغاية ما فاقت .

فقال شفيق:

\_ ياللا نروح عشان نستريح .

فقال جلال:

ـــ من رأيس نعرضها على دكتور ؟

فقالت نبيلة في تخاذل:

ـــ أنا كويسه دلوقت .. ما فيش لازمه .

فقالت أحلام:

ــ نشوف دكتور أحسن ؟ .

وركبوا وانطلقوا إلى عيادة دكتور يعرفه جلال ، فلما فحصها خرج إلى المنظرين في الخارج وقال لهم :

الما الما الما

ـــ مبروك .. الست حامل .

وظهرت دهشة كبيرة على وجه شفيق ، وقالت أحلام في ارتياب :

ــ حلوه دی .

وقال جلال لشفيق ساخرا :

ـــ مبروك .. روح بيع العربيه .

وظل وحه شفيق مسودا وهو كظيم ولولا بقية من حياء لعض أنامله من الغيظ . وخرجت نبيلة ، ولما رأت زوجها قرأت في وجهه الحزن فسارت مطرقة وإن كانت تفكر في العاصفة التي ستهب إذا خلاكل منهما بصاحبه .

وعادوا إلى السيارة صامتين وانطلقت بهم وهم في شرودهم ، وظل شفيق ونبيلة يغشاهما وجوم حتى إذا ما أغلق عليهما باب شقتهما انفجر شفيق في غيظ :

\_ عاجبك كده .. ده اللي اتفقنا عليه ؟

فقالت في تخاذل:

\_ وانا كنت اقدر اعمل إيه ؟

\_\_ كنتى تقدرى تعملى كتير .. أنا كنت حاسس ليلة ما وصلت أمك ورجعت انك بتغشيني ، ليه عملتي كده ؟ .. ليه غشتيني ؟ ..

وأطرقت نبيلة و لم تنبس بكلمة ، وراح شفيق يعمل في سرعة فدنا منها وقال :

\_ لكن معلش ، ملحوقه .. اللي في بطنك ده لازم ينزل .

فشدت نبيلة قامتها وقالت في تحد:

\_ مستحیل .

فقال لها في حزم:

\_ أنا مش ح اسمح لك إنك تحطمي كل اللي بابنيه ، مش ح اسمح لك إنك تضيعي مستقبلي . . اختاري بيني وبينه .

فقالت نبيلة في إصرار :

\_ مش ح انزله أبدا .. أبدا .

فقال في انفعال شديد:

ــ خلاص .. إنت حره .

كانت زينب تستشعر قلقا لا تدرى مصدره وانتابتها هواجس ، فأ, ادت أن تشرك الآخرين في مشاعرها فقالت :

\_ اللهم اجعله خير . عيني الشمال بترف .

فقال لها حسين الذي كان يساعد سوسن على حل واجبائها:

\_ روحي حطي فيها قطره .

وجاء سامي وقال لها :

\_ لما تيجي جيهان ابقي هنيها يا ماما .

فقالت له أمه في ضجر:

ــ يا بني ابعد عني دلوقت ، باقول لك عيني الشمال بترف .

فقال سامي نافد الصبر:

\_\_ هو أنا باقولك حاجه وحشه ، باقول لك لما تيجى جيهان ابقى هنيها .

\_ اهنيهاعلي إيه ؟

\_ على إنها اتخطبت .

ولفت الحوار نظر حسين فترك سوسن واقترب يرهف السمع ، سمع

زوجته تقول :

\_ ولما اتخطبت ح تيجي ليه ؟

\_ ح تيجي تذاكر .

فقالت زينب في دهشة:

ــ وخطيبها عارف إنها ح تجيلك ؟

\_ عارف إنها ح تيجي تذاكر .

فالتفتت فرأت زوجها فقالت :

\_ سامع يا حسين ؟ خطيبها عارف إنها ح تيجي تذاكر مع ابنك .

فقال حسين في هدوء :

ـــ وفيها إيه ؟

ولم تحتمل ذلك ولم تستطع أن تتصوره فقالت في غيظ:

ــ يا خواتى رجالة إيه دول ؟ رجالة آخر زمن .. رجاله قش .

والتفتت إلى سامي فى شك وقالت :

ــ ما تقول يا بني .. إنت راجل واللا إيه ؟

وأحس سامي أن كرامته قد جرجت فقال :

ــ يا ماما انتى من زمن غير زماننا .

فقالت زينب :

ـــ الحمد لله إنى من زمن تانى .

وصمنت قليلا ثم قالت:

ــ جوزها ده بيشتغل إيه ؟

- \_ طالب في الجامعه معانا .
- \_ و لما هو معاكو ما تذاكر معاه .
  - .... ده في السنة النهائية .
- \_ طيب ما يذاكر لها بدل ما يسبها لك !!
  - فقال حسن مداعبا زوجه:
  - ــ انت طيبه طيبه بس يا خساره .
    - فقالت زينب في فزع وتحفز:
      - \_ بس يا خساره إيه ؟
      - \_ سوء ظنك بالناس.
  - فالتفتت إلى زوجها وابنها وقالت :
- ــده اللي بيجري في عروفكم بقي مايه مش دم ، ومايه ساقعه كمان .
- ودق جرس الباب فأسرعت زينب وفتحته ، فإذا بها أمام جيهان وجها لوجه وإذا بها تقول لها :
  - \_ ميروك .
  - فيتهلل وجه جيهان بالفرح وتقول:
    - ـــ الله يبارك فيكى .
  - و فوجئت زينب بأن جيهان تقبلها فقالت لها :
    - ـــ والله فرحت لك قوى يا بنتى .
      - \_\_ مرسى يا تانت .
- ــ ده خطيبي .. بيذاكر ، السنه دى آخر سنه عنده ، إن شاء الله

أجيبه ونيجي نزوركم .

وكان حسين وسامى يتابعان الحديث الودى فى دهش ، فأين زينب التى تكاد تذوب رقة وهى تحدث الفتاة من زينب الثائرة الحانقة التى كانت تقذف من فيها ألسنة نار ؟!

ودخلت جيهان ودخل من خلفها سامي ، وما إن جلسا للاستذكار حتى جاءت زينب وأغلقت عليهما الباب في رفق وقالت :

\_ ربنا ينجح مقاصدهم .

ولما وصلت زينب إلى حيث كان زوجها قال لها :

\_ إيه الرقه دي كلها ؟ إيه اللي جرى في الدنيا ؟

فقالت زينب في هدوء :

ـــ مدام اتخطبت ربنا يهنيها .. أنا كنت خايفه لتلهف الواد .

فقال حسين ليغيظها:

\_ ما ح تلهفه واحده تانيه ، إيه الفرق بين التانيه دي وبين جيهان ؟

ـــ التانيه دي أنا ح اختارها على عيني .

وتذكرت عينها الشمال .. إنها هدأت الموقف وتركت كل شيء يمر في سلام لتقضى على مخاوفها التي استولت عليها ، إلا أن عينها الشمال لا تزال تر تعش فقالت :

\_ لسه عيني الشمال بترف .. اللهم اجعله خير .

ورن الجرس الخارجي فهرعت سوسن تفتح الباب فألفت نبيلة وقد حملت حقيبة كبيرة ، فصاحت سوسن قائلة : \_ أبله نبيله جت .. معاها شنطه كبيره .. باينها مسافره ؟ .

والتفت حسين إلى زينب فى ذعر فقد غلص قلباهما لما سمعا من سوسن إعلان وصول أختها ، وزاد فى جزعهما خبر الحقيبة الكبيرة التى تحملها ، وقال حسين فى صوت فيه رنة أسى :

\_ يا ترى جت ليه ؟

\_ مش عارفه .. خليك انت هنا لما اشوف إيه .

وذهبت زينب وتصنعت الهدوء واغتصبت ابتسامة وقالت في ترحيب لما رأت ابنتها وإن كان قلق بالغ يدثرها :

\_\_ أهلا .. أهلا .

ومدت يدها تحاول أن تحمل عن ابنتها الحقيبة ، ولكن نبيلة أبعدت الحقيبة عن متناول يد الأم وسارت شاردة تحاول أن تجمع شجاعتها التي تناثرت وأن تحبس الدموع التي تريد أن تطفر من مقلتيها ، إلا أن غريزة الأم كشفت كل شيء ، فطنت إلى أن ابنتها في محنة فإذا بالأسي يغمر عواطفها وإذا بلهفة على أن تعرف أسباب مقدم ابنتها تستولى عليها ، فما أن صارتا في غرفة البنات وحدهما ووضعت نبيلة الحقيبة على السرير حتى قالت الأم :

\_ ایه الل جری یا نبیله ؟

فانفجرت نبيله باكية ، فأسرعت الأم تضمها إلى صدرها وتقول وقد ترقرقت الدموع في عينها :

\_ بس يا بنتي بلاش عياط وقولي إيه اللي جرى .



\_ شفيق .

\_ ماله ؟

\_ زعل لما عرف إنى حامل.

ــودى حاجه تزعل ؟ ده أمره غريب .. زعل بدل ما يفرح ؟!

ـــ وطلب منى إنى أنزل اللي فى بطنى .

\_ اوعى يا نبيله يا بنتى ، تروحى فيها ، والله لو كان جرالك حاجه

ما كان يكفيني فيكي هو ولا عيلته كلها .

فقالت نبيلة وهي تنشج بالبكاء :

\_ ده قال : لانا لهوه .

\_ لأ هوه .. ده هو من لحمنا ودمنا ، هو حد ينزل اللي ف بطنه إلا إذا كان ابن حرام !

\_\_ يا ماما أنا مش ح انزله مهما يحصل .

\_\_ تنزلیه ازای ؟ ده ضناکی ؟ حدیموت ضناه با پیدیه ؟ وتروحی من ر بنا فین ؟

وساد بينهما صمت لحظة ثم قالت الأم:

\_ روحى اغسلي وشك وغيرى هدومك ، بيت أبوك اللي ساعك قبل ما تتجوزي يساعك بعد ما تجوزتي ، ده احنا نشيلك جوه عنينا .

و فتحت نبيلة الحقيبة فإذا بها ملابسها ، فأخرجت قميص النوم وانطلقت زينب إلى حيث كان حسين قلقا أرقا ، فما أن رآها حتى خف إليها يقول لها في لهفة :

\_ حصل إيه ؟

\_ شوية نقار بينها وبين شفيق .

\_ سببه إيه ؟

\_ عرف إنها حامل زعل وعايز ينزله .

... وح تعمل إيه دلوقت .

\_ ح تفضل معانا لغاية ما ييجي ياخدها ورجله على رقبته .

كانت أحلام تسير وقد ازداد بطنها انتفاخا و لم تكن تحس نفس الانشراح الذى كانت تستشعره كلما خرجت لتتمشى فإنها منذ غضبت نبيلة وعادت إلى بيت أبيها أمست تخرج وحدها وفى النفس أسى ، فما كان يخطر لها على قلب أن يصل الحب الذى كان بين نبيلة وشفيق إلى مثل ذلك الجفاء البارد الثقيل .

وكان جلال يسير إلى جوارها صامتا ؛ وكان ذهنه مشغولا بما كان بين نبيلة وزوجها. إن صداقة متينة كانت توطدت بينهم جميعا فإذا بغياب نبيلة وشفيق يترك فراغا في حياته يسبب له ضيقا ، وما كان بقادر على أن ينفر د بأفكاره فقال :

- \_ إيه اللي عمله شفيق ده ؟ بقى ده معقول ! أنا ح اروح اكلمه . فقالت أحلام في إشفاق :
- ـــ بلاش يا جلال . إن كلمته ح يركب راسه ، وإن عرفت نبيله ح تزعل .
  - ــ وإيه اللي ح يزعلها ؟
  - ــ كلامك لشفيق عشان يرجعها ح يجرح كرامتها .

\_ كلام إيه ده ؟ أمال فين إصلاح ذات البين .

... إن كلمت شفيق ورجعها يبقى عشان خاطــرك مش عشان خاطرها ، وإن رفض يصلحها تبقى أسأت وزودت الخلاف ، أنا رأيى إنك تسيبه لغاية ما يرجع لعقله .

فقال ضيقا بحديثها:

\_ ما هو لو فكرنا في كرامته وفي كرامتها مش ح نعمل حاجه . أنا ح اكلم شفيق .

وكانت احلام في قرارة نفسها تتمنى أن يقوم زوجها بتلك الوساطة ، أن يعيد أختها إلى بيتها ، فليس للمتزوجات غير بيوتهن وإن فتح الآباء أذرعهم مرحبين . كانت أمها تقول لها دائما « هي الواحده تستريج إلا في بيتها ؟ » ، وكانت تعجب من قولها قبل أن تتزوج ، أما وقد تزوجت وأصبح لها مملكة صغيرة ترعاها فقد عرفت حقيقة ذلك القول .

وسارا يتحدثان نم عادا إلى البيت سيرا على الأقدام ، وصعدت أحلام لتستريح من رياضتها التى فرضت عليها وانطلق جلال لا يلوى على شيء . كان شفيق في البيت وحده تبدو عليه الكآبة والسأم إنه اعتاد أن يجد نبيلة في انتظاره ، وإذا خرج خرجت معه . صارت جزءا من حياته . إنه لا يدرى لماذا تطوف بذهنه أسعد أيامه معها منذ أن غادرت البيت . إنه يذكر ليلة الزفاف ، فلو أنها كانت ليلة بسيطة إلا أنها كانت مترعة بالمتعة التي استقرت في أغوار نفسه .

إن المتعة الحسية سرعان ما تتلاشي ، ولكن متعة اتصاله بها لم تكن

متعة مادية فحسب بل كانت امتزاج روح بروح ، ذوب نفس في نفس . ولو لا أنه بطبعه لا يحب أن يكشف عن حقيقة مشاعره لظل يقول لها إنه يحبها .. يعبدها ، إلا أنه كان في قرارة نفسه يعتقد أن تعرية الحب تفسده كما أن الطعام يفسد إذا ما تعرى .

ووسوست له نفسه فى لحظات أنه كان قاسيا معها يوم أن ثار فى وجهها لأنها حملت ، واتهمته بمجافاة المنطق والذوق : ولكن غروره ثار على تلك الثورة وراح يقنعه بأن ما فعله كان جزاء وفاقا على أن خدعته وحملت على الرغم مما كان بينه وبينها من اتفاق .

طرق جلال الباب فنهض شفيق وقد تصارعته أحاسيس متباينة . ترى أعادت نبيلة لتعتذر ؟ ولم يصدق ذلك الخاطر فهو يعرفها شديدة الحساسية ، شديدة الاعتزاز بكرامتها ، فإذا لم تكن نبيلة فمن يكون ؟ وفتح الباب فإذا بجلال أمامه ، ومد بصره من فوق كتف جلال فقطن جلال إلى ما يرمى إليه فقال له :

- \_ ما تخافش دانا لوحدى .
  - \_ أمال فين أحلام ؟
- فقال جلال ليفتح بابا للحديث :
- \_ ح تيجي لمين يا سي شفيق ؟ اللي كانت بتيجي لها مش هنا .

وانطلقا إلى حيث كان شفيق جالسا فوقعت عينا جلال على منفضة

- السجاير ، إنها تكاد تطفح بأعقاب السجاير فقال جلال :
- ـــ إيه ده كله يا شفيق ؟ إنت كنت بتشرب خفيف .

ولاحظ الوجوم الذي كسا وجهه فأراد أن يرده إلى طبعه حتى يستطيع أن يتجاذب معه أطراف الحديث دون ثورة أو انفعال . فقد يده وراح يقلب في أعقاب السجاير ثم ابتسم وقال :

ــ براءة ، ما فيش ولا عقب فيه روج .

وابتسم شفيق وقام وهو يقول :

\_ قهوه واللا اجيب لك حاجه ساقعه ؟

\_\_ إذا كان ضرورى هات حاجه ساقعه ، مين عندك ح يعمـل القهوه .

وأحس شفيق أن جلال ماجاء إلا ليحادثه في موضوع زوجه ، فسار إلى الثلاجة على مهل يفكر ويرتب أفكاره ، ثم عاد ليحمل زجاجتين ليمو نادة وجلسا يشربان . قال جلال :

\_ إيه اللي عملته ده يا شفيق ؟ بقى نبيله تستاهل منك ده ؟

فقال شفيق وقد بدأت دماؤه الحارة تتدفق في عروقه :

\_ وكنت عايزني أعمل إيه ؟ اتفقنا على حاجه وكان كله برضاها ، نمت وصحيت عرفت انها كانت بتكذب على ، كانت بتخدعني .

ـــ ما تقولش كانت بتخدعك ، دى كلمه كبيره قوى ، الناس تفتكر ايه ؟

\_ أمال اللي تبقى عايشه معاك شهرين وكاتمه عنك سرها تبقى إيه ؟

\_\_ يمكن ما كانتش عارفه .

\_ يا ريت ، دى كانت مدبره كل شيء ، دا اللي غايظني .

- \_ يا سيدى اللي حصل حصل .
  - \_ لا يا جلال ده مش كلام .
    - \_ طب وعايز إيه دلوقت ؟
- ــ تنزل اللي في بطنها ، ولما تخلف يبقى باتفاقنا احنا الاتنين .
  - ــ وإن ما نزلتوش ؟
  - \_ تفضل عند أهلها .
  - ــ قوم البس واخزى الشيطان . قوم .
    - \_ على فين ؟
    - ــ نروح نجيب مراتك .
    - فإذا بعناد شفيق يستولى عليه فقال :
- \_ إذا رحت لهم برجليه معناها إنى وطيت . وساعتها ح يركبوا ويهزوا رجليهم .
- کلام إیه اللی بتقوله یا شفیق ؟ إن رحت لهم تبقی صاحب
   مروءة ، غلطت ورجعت عن غلطك .
  - فغضب شفيق ونهض وقد استولت عليه عصبية وقال:
- ـــ أنا ما غلطتش ، هي غلطت مرتين ، مره لما ضحكت عليَّه ومره .
  - لما لمت هدومها وخرجت .
  - ـــ هي لمت هدومها لما طردتها .
- ... أنا ما طردتهاش ، كنت متنوفز وكان من حقى إنى اتنوفز ، كان فيه إيه لو استحملتني شويه .

فحسب جلال أنه ثاب إلى رشده فقال له:

ــ خلاص يا سيدي ، انت غلطت وهي غلطت تبقوا خالصين ، ياللا نروح نجيبها ويا دار ما دخلك شر .

\_ سبق قلت لك ما اقدرش افتح بيتين ، إن خلفت ح ابيع العربيه ،

وأنا دلوقت مش مستغنى عن العربيه.

ــ يعنى مستغنى عن نبيله ؟

وصمت شفيق و لم يحر جوابا فقال له جلال:

- يا للا يا شفيق بلاش تعاند نفسك .

وضايق شفيق أن جلال بدأ يستشف خبيئته فقال في إصرار :

ــ يوم ما تعرف إني بعت العربيه ، ساعتها بس أبقى ح ارجع نبيله .

ورأى جلال أن لا طائل تحت ذلك الحوار وأنه زج بنفسه في مشادة خاسرة ، فقال :

ــ يا داخل بين البصلة وقشرتها ، ما ينوبك إلا صنتها .

جاءت أحلام وجلال إلى منزل أبيها فى الشهر الأخير ، فوجدت أن من الأسلم أن تكون إلى جوار أمها فإذا ما فاجأها المخاض كانت بين أهلها فى رعايتهم جميعا ، وهرعت نبيلة إليها تقبلها فقال سامى معلقا :
\_ ولاد الخاله يجوزوا لبعض ، ابعدى بطنك يا أحلام عن بطنها .

\_ ولاد الخاله يجوزوا لبعض ، ابعدى بطنك يا احلام عن بطنها .
وأشرق وجه الأم بابتسامة عريضة وغمرها سرور فياض ، وكان
حسين تتنازعه عواطفه لا يدرى أيفرح أم يرثى لنبيلة التي كانت أشبه
بأرملة وإن كان زوجها على قيد الحياة .

وقالت سوسن وهي تجذب أحلام من ثوبها :

\_ أبله أحلام ، عارفه ح تنامى فى سريرى الليله دى ، أبله نبيله بتنام فى سرير هاله .

فمالت أحلام وقبلتها وقالت لها:

ـــ كتر خيرك يا حبيبتي .

وقال مراد في سذاجة :

ــ الحمد لله إنكم جيتوا بعد الامتحانات ما خلصت

ونظر إليه أبوه نظرة تأنيب ، فأطرق مراد وإن لم يفهم سبب نظرات العتاب التي رماها بوه بها ، وأقبل عاطف يحمل الكلب فقالت الأم

عاضيه:

\_ قلت لك الكلب ده ما ينزلش م السطح أبدا .

فقال عاطف مبررا ما فعل:

\_ أنا لقيت العيله كلها هنا ما فيش حد غايب إلا سوزى ، قلت جيبه .

وضع الكلب على الأرض فراحت أحلام تمسح له شعره في حنان وتداعبه وتناديه :

ــ سوزى .. سوزى .

والتف الأولاد حول سوزى يلاعبونه ، وإذا بفكرة تطرأ على ذهن مراد فيقول :

\_\_ نسیب أحلام ونبیلة ینادوله ، اللی یروح لها منهم تبقی ح تجیب ولد .

وعلى الرغم من سذاجة الفكرة فقد تأخر الجميع وتركوا أحلام ونبيلة تحاول كل منهما أن تغرى سوزى ليتجه إليها . وقد صادفت اللعبة هوى في نفس زينب فتقدمت ترقب التجربة ، أما حسين فقد منعه وقاره أن يشارك صراحة فيما أثار الحماس بين الجميع .

وذهب الكلب إلى نبيلة ثم عطف على أحلام ، فإذا بزينب تتهلل بالفرح وتقول :

\_ الاتنين ح يجيبوا ولاد .

وأشرق وجه الجميع بالغبطة ، وإذا بجلال يقول لحماته :

\_ بتحبى يا تانت الأولاد أكثر .

فقالت زينب في إنكار:

\_ أبدا والنبي يا ابني ، كلهم معزه واحده .

فقال سامي وهو يشير إلى سوسن :

\_ بقى أنا عندك زى المفعوصه دى ؟

\_ و تزيد عنها إيه ؟ لك طرطور واللا على راسك ريشه ؟

ورن جرس الباب فأسرعت سوسن إليه وكانت تسابق عاطف الذي جرى وجرى الكلب خلفه ، فلما فتحت الباب ظهرت جيهان فإذا بالكلب ينبح ، فتقهقرت وقالت :

\_ حوشوا الكلب ده ."

فهرع سامي ونحاه وقال لها :

\_ اتفضلي .

ودخلت جيهان وأحلام ترنو إليها في دهش ، وزادت دهشتها لما سمعتها

تقول لسامي :

\_ مبروك يا سامى ، نجحنا .

فقال لها سامي في انشراح :

\_ مبروك يا جيهان .

ودارت على عقبيها وقالت :

\_ عن إذنكم .

فقال حسين:

- \_ ما بدری ، اقعدی استریحی .
- ... ما اقدرش ، بابا مستنى تحت .
  - فقالت لها زينب :
    - \_ ابقى تعالى .
  - \_ من عيني يا تانت .
  - ــ تعرف تفصلي ولا تخيطي ؟
  - \_ طبعا يا تانت .
- فقالت زينب وهي تشير إلى بطن أحلام ونبيلة :
- ــ تبقى تيجي تساعدينا في خياطة هدوم النونو والنونو .
  - \_ حاضر يا تانت .
  - وانصرفت جيهان وقالت أحلام :
    - \_ ما قعدتش ليه ؟
    - فقال مراد :
    - \_ أصل أبوها تحت .
    - \_ طب ما طلعش ليه ؟
- فقالت زينب في لهجة عادية من كثرة ما كررت العبارة :
  - ــ بينكسف .
  - وقالت أحلام :
  - ـــ عروسه حلوه يا ماما .
  - ــ دى بتذاكر مع سامي ومخطوبه .

وقالت نبيلة في خوف :

ـــ أنا ح اروح بكره أشوف نتيجتي .

فقال حسين :

\_ مصمونه . ما تتعبيش نفسك .

والتف مراد وعاطف وسوسن حول سامي وقالوا له :



ــ انت عايز تاكل علينا الحلاوه كلنا ؟

\_ أبدا ، حالا ح احلى لكم بقكم .

وذهب إلى أبيه وقال :

\_ كلهم طالبين حلاوة النجاح .

فقال حسين في بساطة:

\_ طيب ما تجيب لهم .

ـــ واجيب لهم منين ؟ ما فيش فلوس .

فقال حسين دون أن يتبرم أو يظهر عليه أي أثر للضيق :

ــ المحفظة في جيب الجاكته جوه ، خد اللي انت عايزه .

كان حسين سعيدا لنجاح ابنه وكان واثقا من نجاح نبيلة فلم يشأ أن يجعل أى شيء يؤثر على انشراح صدره ، وكان على استعداد لأن يفعل كل ما في وسعه ليجلب السرور إلى قلوب أبنائه .

ودخل سامى وفتح حافظة أبيه فلم يجد فيها نقودا كثيرة ، فسحب منها جنيها وأعادها إلى مكانها وهو يحس نحو أبيه حبا عظيما امتزج بإشفاق على الرجل الذى يحرم نفسه ليجود على فلذات أكباده . وهبط سامى مهرولا فإذا بعاطف وسوسن يجرون خلفه ليلحقوا به ، فإنه لمنظر يرضى غرورهم أن يروا أخاهم الأكبر يشترى لهم حلوى بجنيه .

وعاد سامي يحمل صندوق الجاتوه وراح يسأل وهو يستشعر أهميته:

\_ الشاي جاهز ؟

فقالت زينب وهي تدفع أحلام ونبيلة أمامها :

ـــ كل حاجه جاهزه .

و دخلوا غرفة السفرة و جلسوا يشربون الشاى ويأكلون الجاتوه . وتلفت عاطف وفى غفلة من الجميع أخذ واحدة وانطلق إلى سوزى وراح يطعمها للكلب فما كان يستطيع أن يحتمل أن تأكل الأسرة كلها ويحرم

الكلب.

وتلفتت نبيلة تبحث عن شيء .. إنها في حاجة إلى كوب ماء . فلما لم تجد قالت لمراد :



ــ والنبي يا مراد ناولني كباية ميه .

ونهض مراد متبرما وقال لنفسه وهو في طريقه إلى المطبخ :

... هو احنا بنجوزهم علشان يرجعوا لنا تاني !

وعاد مراد يحمل كوب الماء وقدمه إلى نبيلة وقال:

\_ اتفضلي .

وقبل أن يجلس قال :

\_ حد عايز حاجه قبل ما اقعد ؟

فقال له سامي ليغيظه:

\_ ح تقعد ليه ؟ ما كل حاجه خلصت .

وظهر الضيق في وجه مراد .. أأرسل ليحضر ماء ليحرم من الجاتوه ؟

ولم يطل ضيقه فإن زينب قدمت له واحدة وهي تقول له :

ــ ما تزعلش .. أنا شلت لك دى .

وتناولها مراد وراح يقضمها وهو واقف فما كانت تستأهـل أن يجلس . ونهض حسيَّنُ وقال :

\_ اتمسوا بالخير .

وذهب إلى غرفة النوم ، وقالت زينب لهالة وعاطف :

ــ تعالوا انتوح تباتوا معانا من النهارده .

فقالت أحلام:

\_ خل هاله تنام جنبي وعاطف ينام جنب نبيله .

فقالت الأم وهي تبتسم .

ــ هو ده معقول ؟ دول بيرفسوا طول الليل .

فقالت أحلام في أسف:

\_ ح نضايقكو .

ــ ما تقوليش كده .. السرير واسع يساعنا وزياده .

ودخلت زينب إلى غرفة النوم تسوق أمامها عاطف وهالة . وما أن أغلقت البابا حتى راحت تقرش لعاطف فراشا على الأرض وأنامت هالة بينها وبين حسين . وما أن أغمضت هالة عينيها حتى تحركت بحيث أمسى رأسها في بطن أمها ورجلاها على بطن أبيها .

كانت أحلام في سريرها ونبيلة في سريرها وقد راحت نبيلة في النوم . كانت تتحدث كعادتها في نومها وما كانت أحلامها تدور حول المدرسة وما فعلته في يومها كما كان ذلك شأنها قبل أن تتزوج ، بل كانت تحلم بشفيق ، فما أكثر ما نادته وهي غاضبة . وكانت أحلام تتلوى من الألم . إنها كانت تحس أن شيئا يتحرك في أحشائها ، وقد خطر على بالها أكثر من مرة أن تنهض وأن تطرق باب نوم أمها ، ولكنها كانت تشفق على أبيها قما كانت تحب أن تقلق راحته . واشتد بها الوجع فنهضت وهي تضع يدها في وسطها كأنما تمسك شيئا خشية أن يسقط ، وسارت إلى غرفة نوم أمها ورفعت يدها لتدق الباب ولكن خجلها منعها فعادت وهي ترجو أن تستيقظ نبيلة ، إلا أن نبيلة ظلت تجتر أحلامها .

وفى الصباح نهضت زينب وكان أول ما فعلته أن انطلقت إلى حيث. أحلام ونبيلة ، فألفت أحلام تتأوه فقالت لها :

\_ صباح الخير .. نمتي كويس ؟

ـــ صباح النور يا ماما ، طول الليل بتأ لم م الوجع .

(الحفيد)

واستيقظت نبيلة على الحديث الدائر بين أمها وأختها فجلست في الفراش تفرك عينيها ، سمعت أمها تقول لأحلام :

ــ و حاسه بایه دلوقت ؟

\_ كأن إيد هون بتدق في ضهري .

ــ تبقى ح تولدى .

فغادرت نبيلة الفراش وقالت:

\_ مستنيين إيه ؟ ما تبعتوا للدكتوره .

فقالت الأم في ثقة:

\_ لسه بدري يا نبيله .. البكريه تطول شويه .

وذهبت نبيلة إلى الحمام فإذا بها تلقى سامى عند الباب وقد وضع فوطة فوق كتفه ، فلم تسرع لتدخل كما كانت تفعل وتغلق الباب خلفها بل تأخرت خطوات وقالت وهي تفسح الطريق أمام أخيها :

\_ اتفضل .

فالتفت سامي إليها وقال:

ـــ كبرنا وعقلنا .

وما كاد يتم كلامه حتى جاءت سوسن تجرى واندفعت إلى الحمام وأغلقت الباب خلفها ، فإذا سامي يثور ويقول لها مهددا :

ـــ بس لما تطلعي أنا ح اوريكي .

فابتسمت نبيلة فما حدث يذكرها بأيام سعيدة مرت بها . أيام لم تعرف حقيقة قيمتها إلا بعد أن فقدتها . ثم التفتت إلى سامي وقالت له :

\_ بكره تكبر وتعقل .

و لم تحتمل أحلام الآلام التي كانت تموج في جنباتها ، فغـادرت الفراش وأخذت تقطع الشقة جيئة وذهوبا ، حتى إذا لمحت أباها يخرج من غرفته سعت إليه وتعلقت به وهي تقول :

\_ ح اولد إزاى با بابا ؟

فقال الرجل وهو يتصنع الهدوء :

\_ ما اعرفش .. دى حكمة ربنا ، اللي اعرفه إنك ح تولدي .

وغادر الرجل البيت ليذهب إلى عمله ، وراحت أحلام تتلسوى وتصرخ فينتاب الفزع نبيلة فلا تجد إلا أن تذهب إلى أمها وتقول لها :

\_ ما تبعتي تجيبي الدكتوره .

\_ لسه يا نبيله .

ــ ولو نزل دلوقت ؟

\_ ح استلقاه على أديه .

ونظرت إليها نبيلة في ضيق وعيناها تقولان : يا قلبك . واستمرت أحلام تتلوى وقد ارتفع صراخها فقالت نبيلة :

\_ إن ما بعتيشي يا ماما للدكتوره ح اروح لها انا .

فنزلت الأم على رغبتها وقالت لها :

\_ ح ابعت لها وروحي انتي سخني الميه .

وراحت زينب إلى حيث كان أولادها وقالت لهم :

\_ مين فيكو يروح ينده للدكتوره ؟

فصمتوا جميعا .. فقالت زينب :

ـــ اللي يروح فيكو ح اديله قرش .

فقال عاطف في حماس:

\_ أنا ..

\_ شاطر .. روح قل لها تعالى حالا ، أحلام بتولد .

ــ هاتى القرش قبله .

فمدت يدها في صدرها وأخرجت منديلا بسطته وأخذت قرشا من بين النقود وأعطته عاطف ، فراح عاطف يهرول هابطا وإذا بالكلب يهبط من السطح ويقتفي أثره .

ودخلت الأم غرفة أحلام وأخذت تعيد تنسيقها وتخرج الثيباب والأقمشةالتي سيلف فيها المولود ، واشتد صراخ أحلام فقالت لها أمها :

ــ دى طلقة ولد .

فقالت أحلام متبرمة :

\_ أنا لا عايزه ولد ولا بنت .. عايزه اللى فى بطنى ينزل ويريحنى . وجاءت الدكتورة ودخلت مسرعة ، وسارت إلى حيث كانت أحلام فألفتها تتأ لم وتتلوى ، فنظرت إلى زينب وقالت مستأذنة :

\_ أديها حقنة تحمى الطلق ؟

فقالت زينب وقد لاح في وجهها فزع :

\_ لا ياختى .. أنا ما احبش الحقن .

ودخلت نبيلة عليهم وقالت :

\_\_ جلال جه .

فصاحت أحلام:

\_ هاتوه يولد معايا .

وصل قولها أذنى جلال فانكمش ، فجاءه سامي وقال له مداعبا :

ــ ما تخش تولد معاها ، بس فالح تعملها .

و لم يبتسم جلال .. كان مشفقا على زوجه يتعجل ولادتها لينتهى ما هى فيه من عذاب . وراح يغدو ويروح وقد صار كله آذانا ، إنه يسمع كل همسة في الحجرة ، بلغه قول الدكتورة :

ـــ اتفضلي انتي بره بقي .

فراح يرقب الخارج وسمع الأم تقول:

\_ ناوَليها الميه السخنه .. لأ ما تشيليهاش انتى .. خلى سامى واللا مراد يجيبها .

وأسرع جلال إلى المطبخ وعاد يحمل طستا به ماء يغلى ، فإذا بنبيلة تقابله في منتصف الصالة فتقول له :

\_ عنك انت .

فيأبي أن يترك الطست لها فتسير إلى جواره حتى إذا بلغا باب غرفة أحلام قالت :

\_ خدى الميه من جلال يا ماما .

وتفتح زينب الباب وتأخد منه الطست وتقول:

\_\_ إيد ما تعدمها .

ويأتى حسين ويرى بخار الماء يملأ جو البيت فيقول :

ـــ هي لسه ما ولدتش ؟!

فيرد عليه جلال :

ــ لسه يا عمى .

ويفطن حسين إلى وجود جلال فيقول له :

\_ إزيك يا جلال .. ما تآخذنيش يا ابني .

ويجول جلال وحسين خلال الشقة وقد لفهما قلق ، و لم يحتمل

حسين ذلك فالتفت إلى جلال وقال :

\_ أنا نازل الشارع اتمشى .. تيجي معايا يا جلال ؟

\_ أنا ح افضل هنا .

ـــ لما تولد ابقوا قولوا لي .

وخرج حسين وأولاده يرقبونه فى دهشة فما كانوا بقادرين على أن يعرفوا حقيقة شعوره ، وراح جلال يرصد الساعة التى فى الصالة ، إنها تسير ببطء شديد كأنما الزمن قد توقف . واتجهت نبيلة إلى باب الغرفة تتصنت فإذا بسامى يذهب إليها ويقول لها وهو يجذبها من يدها فى رفق : سـ تعالى استريحي .

وارتفع صراخ مولود وإذا بالبشر يكسو جميع الوجوه ، حتى هالة تهللت بالفرح ، ومر وقت ثم خرجت زينب لجلال وقالت لجلال :

ــ تتربى فى عزك .

\_ مرسى يا تانت .

وقال سامي في عدم ارتياح :

\_ بنت . . أنا ما احبش البنات .

فقال جلال في استسلام:

\_ كل اللي يجيبه ربنا نعمة .

والتفتت زينب إلى سامي وقالت:

\_ ربنا مش ح يرزقك إلا بالبنات .

وخرجت الدكتورة وقالت لجلال:

\_ تقدر تتفضل دلوقت .

ودخل جلال وانسل عاطف خارجا في أثر الدكتورة .

نظر جلال إلى زوجه في حب ثم قال :

\_ حمد الله على سلامتك .

وابتسمت أحلام وقالت له :

ـــ قربهو لي شويه أشوفه .

وظهر في وجه جلال دهشه ، وقال وهو يميل فوقها ويجذب فراش الطفل ليقربه منها :

tin to 1 to f

\_ أمال ماما قالت بنت ازاى ؟

\_\_ خايفه لا يتحسد .

فنظرت إلى الوليد وقد نسيت كل آلامها ، وتحركت أمــومتها فقالت :

\_ مش حلو يا جلال ؟

ونظر إليه جلال فلم ير إلا قطعة لحم أحمر فقال :

\_ ح يطلع وحش لمين ؟

ودخل حسين فإذا بأولاده جميعا يدخلون حوله وقد أمسك عاطف بيده كأنما يقول إنه هو الذي استدعاه ، فلما رأى ابنته خفق قلبه في حب وقال في فرح فياض:

\_ حمدا لله على سلامتك .

\_ مرسى يا بابا .

وقال له جلال وهو يشير إلى ابنه الذى استقبل الدنيا بالبكاء ثم استسلم لقضائه :

\_ شوف حسين الصغير حلو ازاى .

فإذا بابتسامة تتوج جميع الشفاه ، وإذا بالدموع تترقرق في عيني زيب فتنسل لتكفكفها بعيدا . ودخل حسين وزينب محلا فاخرا لشراء هدية للمولود ، واتجها إلى جناح الأطفال فرأى حسين ثوب طفل فأخذه بين يديه يقلبه ثم قدمه إلى زوجه وهو يقول :

\_\_ إيه , أبك في ده ؟

فنحت زينب يده بالثوب بعيدا عنها وقالت:

\_ الهدوم عنده كتير .

وأعاد حسين الثوب إلى مكانه وتناول عروسة صغيرة وقال لزينب :

ـــ وإيه رأيك في دى ؟

فقال وهي تجول بعينيها في المكان تبحث عن شيء :

\_ ح يعمل بيها إيه ؟ ده لسه ما يفهمش . نجيب له حاجه تنفعه . وفطن حسين إلى أنها تبحث عن هدية غالية ، فرأى ذلك الشيء المصنوع من جلد أزرق الذي يوضع فيه الطفل ويحمل بعلاقتين في يد

الأب والأم في أثناء الخروج فرفعه في يده وقال لزينب:

\_ أفتكر ده مناسب .

فقالت زينب وهي تقلب عينيها في المكان:

ـــ قربت ،

ووقعت عيناها على بغبتها ؛ إنها عربة صغيرة لها كبود فخم يفتح ويغلق يوضع فيها الطفل وتدفع باليدين تصلح للشتاء والصيف ، فانجذبت إليها وسارت وحسين يتبعها حتى إذا ما قبضت على يدها المصنوعة من معدن لامع ودفعتها إلى الأمام وجذبتها إلى الخلف تختبر متانتها قالت :

\_ هي دي .

ونظر حسين إلى الصندوق المصنوع من الجلد الأزرق وقال:

\_\_ و ماله ده ؟

ـــ دا ما يستعملش إلا والنونو صغير ، تو ما كبر مبقاش له قيمه ، إنحادي ممكن تتحط جنب سريرها وتبقى له سرير .. يعني كلها فوايد .

ولما كان حسين قد تعلم أن لا فائدة من الاعتراض استسلم ، وقالت زينب للرجل الذي كان في خدمتهما :

ــ ممكن تبعتوها ع البيت ؟

ــ بكل ممنونية يا افندم .

... طب اديله العنوان يا حسين .

\_ ما ناخدها معانا ؟ .

ــ لأ . ح نشترى حاجات تانيه .

وأعطى حسين الرجل العنوان وذهب يدفع الفاتورة وهو يتلفت حشية أن تشترى زوجه شيئا آخر . وانصرفا إلى الغورية وراحت زينب تشترى المغات والشمع فأتت على الشمع الذي كان موجودا بالمحل ، ثم انتقلت إلى محل آخر واشترت كل ما فيه من شمع وقالت للرجل :

ـــ ما تعرفش نشتری فول مقشر وحمص منین ؟

\_ فيه مقله هناك حاجاتها كويسه .

وسارت تشق طريقها في زحام الغورية وحسين يحمل ما اشترته ، وعلى الرغم من الزحام راحت تحدثه وتقول :

\_ فين أيامنا الحلوه . . أيام الفستق والبندق واللوز ؟ مين كان يصدق إن ح تيجى علينا أيام نفرق فيها سودانى وحمص وأرواح فى السبوع . . زمن !!

وذهبا إلى المقلى واشترت زينب ما شاءت وحسين واقف متبرم ، حتى إذا ما حملت ما اشترت قالت له :

ــ السوداني بقي أغلى ما كنا ينشتري الفسدق!

و صمت حسين ثم قال:

ــ تعالى نشوف تاكس .

\_ لسه .

\_ لسه إيه كان ؟

ـــ ما اشتريناش الفراخ .

... يعني ضروري النهارده.

ـــ يا نهاري ، أمال أحلام تتنفس بايه ؟ دى الوالده أول ما تنزل العيل

لازم تحط فرخه تسند بيها بطنها .

فقال حسين ساخرا:

ـــ والفراخ دي مش عايزه تلاجه ؟ ما تيجي نشتري تلاجه قبله ؟ و لم يعجبها سخريته فقالت في عتاب :

ــــ هو انا عقلی طاقق لأد كده ؟ التلاجه عند جلال ندبح الفراخ ونضفهم ونوديهم عده ، وكل يوم وهو جاى يجيب فرخه معاه .

\_ وإيه لازمة البعتره دي كلها ؟

ـــ خلينا نشرب ونفرح وجيراننا يشربوا ويفرحوا . مش ده أحسن ماكانت المستشفى تلهف الفلوس ؟

وأطرق حسين لحظة ثم قال :

... ما نشتري فراخ م الجمعيه ولا تعب ولا تنضيف .

ولوت رينب شفتها وقالت:

ـــ هى دى فيها بر ، دى شرىتها زى مية الفول النابت .. البلدى . بلدى .

وسار معها مستسلما إلى الفرارجي ، فراحت تحمل الدجاج تزنه في يدها قبل أن تسمح بوضعه في الميزان . واشترت خمسة أزواج وحسين ينظر صامتا ثم قال :

ــ ما يدبحهم وينضفهم .

ــ أنا اللي حادبحهم في البيت بإيدى .

\_ و ح ناخدهم ازاي ؟

ــ حد يحطهم في قفص وييجي معانا .

هذا ما كان فى حسبانها : إنها تريد أن تعود محملة وأن يسير خلفها من يحمل قفص الدجاج وأن يتحدث الجيران بما جلبت لابنتها . وقبل أن تتح ك للانصر ف قالت لحسين :

- \_ نسينا السمن ، أمال ح نعمل المغات بإيه ؟
- \_ ومين ح يشيله واحنا محملين زي الحمير ؟
- \_ اللي يشيل قفص الفراخ على راسه ياخد السمن في إيده .

وانطلقت إلى بقال وحسين يتحكم في عواطفه وإن كان سينفجر من الغيظ . واشترت صفيحة سمن صغيرة وناولتها للرجل الذي كان بحمل قفص الدجاج فوق رأسه ، فالتقطها في يده وسرى الركب في الطرقات وقد وسعت زينب من خطوها فهي تريد أن تصل إلى البيت قبل سقوط الليل .

ولمحت سيارة المحل الذى اشترت منه عربة المولود واقفة أمام دارهم فاستشعرت زهوا ، وسمعت صوت الكلاكس المتصل فإذا بسعادة تغمرها ، فالكلاكس سيجذب الجيران إلى الشبابيك والشرفات وهذا غاية أمانيها ليروا ما جلبت من طيبات ..

وفتحت النوافذ والشرفات ، وخرج سامى ومراد والأولاد إلى الشرفة ، فلما رأوا والديهم قادمين هرعوا هابطين في الدرج مسرعين ، وجرى سامى ليحمل عن أبيه ما كان ينوء به ولكن أمه قالت بصوت عال لا لتسمعه وحده بل لتسمع الجيران :

ــروح انت يا سامي استلم منهم العربيه .

وكانت العربة قد خرجت من جوف السيارة واستقرت على الأرض فذهب سامى ليتسلمها . وحمل مراد وعاطف وسوسن ما كان يحمله أبوهم والتفوا حول أبويهم فرحين ، فسارت زينب تكاد أعضاؤها تهتز سرورا ، وبين وقت وآخر تلتفت إلى الرجل الذي يحمل قفص الدجاج ويسير خلفهم كأنما كانت تعلن للملأ أن الدجاج دجاجها .

## 11

ذبحت زينب الدجاج ووضعت صفيحة ماء على وابور الجاز وذهبت قدم لأحلام العشاء ، فوجدت أن هالة قد وضعت في العربة وأن موسن وعاطف يتشاجران على من يدفعها أمامه فصاحت فيهم :

\_ إيه المسخره دى ؟ هي دى كان لعبه .

وأنزلت هالة ، فلما وجدتها ستبكى قالت لها :

\_ تعالى نضفي الفراخ معايا .

فقال عاطف:

\_ و انا .

ـــوانت .

وقالت سوسن:

ــ وانا كان .

\_ وانتي كان .

ودفعت العربة أمامها ووضعتها إلى جوار سرير أحلام وقالت لها :

ــ استعمليها بالليل .

ووضعت صينية الطعام في حجر أحلام ، ومالت على الطفل تقبله في

حب ثم خرجت وهي تنادي :

ـــ سامی ، مراد ، نبیله ، سوسن ، عاطف . تعالموا کلکسم اشتغلوا .

واتجهت إلى المطبخ فإذا بجميع الأولاد يلحقون بها ، فوضعت طستا كبيرا في الوسط وقالت للأولاد :

ــ هاتوا كراسي المطبخ واقعدوا عليها .

فأتوا بها وتحلقوا الطست ، وأنزلت صفيحة الماء المغلى من على الوابور وراحت تغمس الدجاج بها وتلقى به فى الطست ، فيتناول كل واحد من أولادها دجاجة ينتف ريشها .

وجاءت هالة وحاولت أن تلتقط دجاجة وأن تفعل كما يفعل إخوتها فإذا بالدجاجة تلسعها فتبكى فتضمها نبيلة إلى صدرها ، ويأتى حسين ليرى ما الذي أبكاها فتقول زينب له :

ــ ما تقعد معانا تساعدنا

فجلس بعد أن أفسح له سامى مكانا وراح ينتف ريش دجاجة ، فامتلأ المكان بالريش .

وقال عاطف وهو يجاهد لينزع ريش جناح الدجاجة التسى كان ينظفها :

ــ اليومين دول سوزي ح يهيص .

فقال له مراد:

\_ ده احنا اللي ح نهيص .

وانسحبت هالة ونامت فى الصالة ، وبعدها انسحب عاطف ، وأرادت نبيلة أن تنسحب فقد مشى التعب فى أوصالها فقالت وهى تنهض :

\_ أما اشوف الاولاد ناموا فين .

وذهبت إلى حيث كانت هالة وعاطف فأيقظتهما في رفق وقادتهما إلى سرير أبويها ، ولم تعد لتستأنف عملها بل تمددت إلى جوارهما ، ولولا خجلها لدخلت لتنام في سريرها . وسرعان ما انسحب سامي ثم مراد ، فلما دقت الساعة الثانية عشرة لم يكن في المطبخ سوى حسين وزينب وسوسن .

ووضعت زينب الدجاج في مصفاة كبيرة وقالت :

\_ الصبح نخلي جلال ياخدهم ويحطهم في التلاجه .

فدنت سوسن من أمها وقالت لها :

ــ عايزه كبده .

لم تكن سوسن تنتظر بلا هدف بل كانت تريد أن تأكل أكباد الدجاج ، وقد صادفت الفكرة هوى فى نفس الأم فراحت تحمر أكباد الدجاج ثم أخذت تأكل مع سوسن وتغرى حسين على مشاركتهما فيه ؟ و لم يستطع مقاومة إغراء الروائح التي ملأت أنفسه ، فأقبل يأكل متلذذا حتى كاد ينسى النوم الذي كان يداعب عينيه .

و بعد أن أكلا لمحا نبيلة تنسحب إلى غرفتها ، فقالت لها أمها بعد أن فطنت إلى أنها لم تدعها على الطعام :

(الحفيد)

ــ تعالى يا نبيلة حمري لك حتتين وكلي .

فقالت نبيلة وإن أسالت الرائحة المنبعثة من المطبخ لعابها:

\_ أنا اتعشيت يا ماما مع سامي ومراد .

ودخل الجميع ليناموا ، فوجدت نبيلة أختها أحلام ترضع وليدها فقالت وهي تبتسم :

\_ هربتي من الجامعه عشان ما تسهريش ، أهو سهرك .

فقالت أحلام في رضا:

ــ بس ده سهر لذيذ .

وفى الصباح الباكر نهضت زينب تقدح السمن للمغات فسإذا بالشقة كلها تعبق برائحة السمن المقدوح ، وهرعت نبيلة إلى المطبخ تعاون أمها قالت :

\_ أساعدك في حاجه ؟

\_ حمصى الفول السوداني .. قال فول سوداني قال .. فين المكسرات ؟ هو المغات يبقى مغات إلا لما يبقى السمن فوق وشه قبراطين ويتملى بالمكسرات .

واستيقظ كل من في البيت فنادت على سوسن وقالت لها :

\_ خدى سلطانية المغات دى إديها لام محمد جارتنا ، وقولى لها حلى الأولاد يبجو في السبوع .

وخرجت سوسن تحمل السلطانية ، ونادت زينب على عاطـف وقالت له : \_ ودى المغات ده لخالتك أم اسماعين وقول لها خلى الأولاد بيجوا في السبوع .

و مادت مراد وأرادت أن تحمله حلة مغات ليذهب بها إلى الجيران فأبي وقال لها :

- ـــ إدى عاطف قرش وهو يوزع لك المغات ع الجيران كلها . والتفتت نبيلة إلى أمها وقالت :
- \_ إنتى ح تفرق مغات ع الجيران كلهم ؟ ح تكفى عليهم منين ؟ \_ خير ربنا كتير .

وتناولت فنجانا كبيرا ملأته مغاتا ورشت فوقه السودانى المطحون وذهبت إلى حسين وقدمته إليه ، واعتذر حسين بأنه لا يستطيع أن يشرب على الريق كل ذلك الدسم ، قالت له :

\_ اشرب يا حسين انت ح تعمل زى الجيل الخرع ده ، دانا ابويا الله يرحمه ما كانش يفطر إلا بطاجن سمك .

وتناول حسين الفنجان كارها وراح يشرب قىل أن يحلق ذقنه .

وجاء سامى وهو يحمل صحف الصباح وهو يقرأ فيها فناول أباه صحيفة وأخذ أخرى يتصفحها ، فأقبلت سوسن ودخلت على أبيها تروى له ما فعلته فهى لاترى شيئا ولا تفعل شيئا إلا وتحكى عنه لا تقدر على الكتان ، قالت :

\_ وديت المغات لام محمد وعم محمود وست رهيره وست فردوس ولكل الجيران اللي في بيتنا وقلت لهم خلوا الأولاد ييجوا في السبوع .

\_ وديتي لكل دول ؟

\_ آه ، وعاطف و دا للجيران اللي قدامنا واللي جنبنا .

ونحى حسين الفنجان جانبا وذهب إلى حيث كانت زينب . إنها كانت في طريقها إلى أحلام تحمل لها الإفطار فقال لها في غضب :

ــ انتى ناويه تعملي إيه يا زينب ؟

ــ سبوع ، انت في ديك الساعة اللي بقيت فيها جد .

ووقف يتلفت في حيرة وغابت زينب في غرفة بنتها .

ودق جرس الباب فراح حسين يفتح فإذا مصطفى علوان وزوجه قد أقبلوا ليروا حفيدهم ، فما أن رأى مصطفى حسينا في جلبابه حتى قال له :

\_ لا مؤاخذه ، النهارده الجمعه وجينا بدري .

ـــ البيت بيتكم اتفضلوا .

ودخلاوفى يدأم جلال صندوق شيكولاتة ، وبلغت الأصوات أذنى زينب فخرجت ترحب بهما وتبادلت المرأتان القبلات ، ثم قالت أم جلال :

\_ مبروك ما جالكو .

فقالت زينب وقد أشرق وجهها سرورا .

\_ ميروك ما جالنا كلنا .

ودخل الجميع غرفة أحلام فوضعت أم جلال صندوق الشيكولاته قريبا من امرأة ابنها بحيث تراه ، ثم مالت عليها وهي تقول : \_ ألف حمد الله على سلامتك .

وقبلتها ، وقال مصطفى علوان :

\_ مبروك ايتربى في عزكم .

وجلس وجلست زوجه ، وذهبت زينب وحملت الوليد ودفعته إلى جدته و هي تقول :

\_ شوفی حسین حلو ازای ؟

وتعكر صفوها لما صك أذنيها اسمه ، ولكنها تناولته على كفيها وهى تقول :

\_ بسم الله الرحمن الرحيم ..

وتطلعت في وجهه ثم التفتت إلى أحلام وقالت :

\_ منين جبتي الوحاشه دي ؟ أبوه حلو وانتي حلوه .

فقالت أحلام:

ـــــ لأ يا نينه ، ده قمر .

ودفعته أم جلال فى رفق إلى زوجها فراح مصطفى ينظر إليه وقد تحركت عواطفه فإذا بإشراقة كبيرة تكسو وجهه . وأخرج من جيبه ورقة من فئة الخمسة الجنهات ووضعها على صدره .. قدم الطفل إلى حسين الذى كان يرقب ما يجرى منفعلا فهو لا يصدق أنه أصبح جدا ، ولما رأى يدى مصطفى ممدودتين بالطفل قال وهو يتقهقر إشفاقا :

\_ لألا . أنا ما حبش أشيلهم وهم صغيرين كده .

وتناولت زينب الطفل وأعادته في خفة إلى جوار أمه ، فقال حسين

وهو يرنو إليه :

- سبحان الله ! بقى ده يكبر ويمشى ويبقى راجل ! فقال مصطفى في فرح :



ویجوز ویخلف ویبقی جد .

وانتهت الزيارة فخرج حسين وزينب خلفهما يودعانهما ، وقبل أن ينصرفا قالت زينب :

ـــ ما تتأخروش عن السبوع .

فقال مصطفى في صدق:

\_ هو احنا بقينا نقدر .

وأغلق الباب خلفهما ، فراح حسين ينظر إلى زوجته في عتاب ويقول لها :

\_\_ إيه الل بتعمليه ده ؟

\_ كان مش عايز جده وتيته يحضروا السبوع ؟!

وهبت أم جلال وزوجها وهي تتلهف على الابتعاد ، فلما وصلا إلى الطريق قالت :

\_ شوف ابنك الخايب ، سمى ابنه على اسم حماه ، كان الأصول يسميه مصطفى ، ده حتى اسم مصطفى جلال لايق اكتر من اسم حسين جلال !

ولزم مصطفى الصمت ، كان لا يحب أن يثير موضوعا للنقاش لا طائل تحته ، وضايقها صمته فأرادت أن تحرك لسانه قالت :

\_ ح تيجي السبوع ؟

ـــودى فيها كلام ؟ سموه حسين جلال سموه مصطفى جلال أنا قلبى اتفتح له . وضع الفول والحمص كوما فى وسط المائدة ، وذهبت زيسنب وسرعان ما عادت بصندوق الشيكولاتة الذى جاءت به أم جلال وصبت ما فيه فوق الفول والحمص وراحت تقلب الكوم بيدها ، وجلس أبناؤها جميعا حول المائدة ولم يغب منهم أحد ، حتى الكلب سوزى كان يمرح حولهم .

كانوا قد قطعوا ورق السوليفان مربعات صغيرة ليلفوا الفسول والحمص والشيكولاتة التي ستوزع على الصغار في « السبوع » وقالت الأم :

ــ ما فيش أكتر من حتة شيكولاتة واحده في كل لفه .

فقالت نبيلة وهي تلف ورقة وتربطها بخيط :

ــ الشيكولاتة مش ح تكفى .

فقالت زينب في إيمان :

ـــ دلوقت ربنا يرزق .

ورن الجرس فتركت سوسس ما في يدها وجرت لتفتح ، وسرعال ما جاء صوتها معلنا عن القادم :

ــ تانت جيهان .

وقامت زينب تستقبلها فتهللت بالفرح فقد رأت فى يدها صندوق شيكولاتة ، فاندفعت إليها تضمها إلى صدرها وتقبلها وتقول :

\_ ليه التعب ده ؟

ے ما فیش تعب ولا حاجہ .. دا سامی قال لی امبارح قلت آجی آبارك لکم .

وتقدمت نبيلة تصافحها ولكنها رأت أن تقبلها ، فأمها قد فعلت ذلك ولا يليق أن تكون التحية بين الشباب أقل حرارة من تحية الشيوخ للشباب .

ودخلت جبهان غرفة أحلام وإذا بسامي يقبل وقد خلع البيجاما وارتدى القميص والبنطلون . وجد أن ذلك أليق . ولما لمح جبهان تضع صندوق الشيكولاتة حيث وضعت أم جلال الصندوق الذي أتت به أراد أن يطمئنها إلى أنهم شاهدوه قال :

\_\_ متشكرين .

وأسرعت زينب تعد لها فنجان مغات يليق بالهدية التمي حملتها ، وسرعان ما عادت به وقدمته إلى جيهان وهي تقول :

ـــ اتفضلی عقبال ما نشرب الشربات يوم فرحك والمغات يـوم عوضك .

وتناولت الفنجان في خجل ورشفت منه رشفة قرأ سامي بعدها في وجهها عدم رضا فقال :

\_ بلاش إذا كنتي ما يتحبيش . نجيب لك حاجه تانيه ؟

\_ أبدا ، ده لذيذ ، بس سخن .

وكانت زينب قد استاءت من قول ابنها ، فلما أبدت جيهان رضاها

عنه قالت :

\_ يا خسارة يا سامي ماليش بخت معاكم .

وأرادت نبيلة أن تغير الموضوع فقالت لجيهان :

\_ خطيبك اتخرج ؟

ـــ أيوه .

فقالت أحلام:

\_ و ح تتجوزوا امتى ؟

ـــ أول ما نلاقي شقه فاضيه .

فقالت نبيلة:

\_\_ ربنا يهون ، لولا جوزى كان فى بيتهم شقه فاضيه كنا زمانما مخطوبين لغاية النهارده .

ولاحظ سامى وأحلام أن هذه أول مرة تذكر فيها زوجها فتبادلا النظرات ، ولم تر زينب فى ذلك ما يدعو إلى الملاحظة أو الاستغراب فقالت لتجامل جيهان :

... ح تفرج ، الحكومه قالت ح تبني شقق للعرسان .

فقال سامي بسخرية:

\_ قالت .

وسألت نبيلة جيهان :

ــ وناويه تكملي بعد الجواز ؟

\_ طبعا .

وقالت أحلام :

ــ واتفقتوا إنكم ما تخلفوشي إلا بعد ما تخلصي الجامعه ؟

\_ طبعا .

فالتفتت أحلام إلى نبيلة وقالت :

\_ كلهم بيتفقوا في الأول على كده وبعدين يفهموا.

وقالت نبيلة مؤيدة أختها :

\_ ما فيش ست يا جيهان تستحمل تضيع شبابها من غير ما تخلف .

فقالت جيهان في تحد :

ـــ أنا .

فقالت نبيلة في استسلام:

\_ كلنا قلنا كده .

وكانت زينب تتململ في جلستها . لم تكن ضيقة بالحديث الدائر ولكنها كانت تتلهف على أخذ الشيكولاتة التي جاءت بها جيهان لتصبها فه ق كوم الفول و الحمص و تخلطها به . و جاءت سوسن وقالت :

\_ انتو ح تقعدوا هنا على طول ؟ أمال مين اللي ح يلف الشيكولاته ؟ ونهر ها سام قائلا:

\_ امشى دلوقت .

وارتاحت زينب لما فعلته ابنتها فنهضت وقالت :

ـــ جيهان مش غريبه تيجي تشتغل معانا ، نتعب لها في يوم فرحها . فقالت جيهان وهي تنهض دون أن تدرى ماذا ستفعل :

\_ قوى يا تانت .

وساروا إلى غرفة الطعام ، وتذكرت زينب شيئا فعادت وأخذت علبة الشيكولاتة واتجهت بها إلى حيث ذهبوا .

ورأت جيهان كوم الفول والحمص والشيكولاتة ، ورأت مراد وسوسن منهمكين في لف ورق السوليفان ففطنت إلى ما ستفعله فجلست . وأقبلت زينب وقد صبت الشيكولاتة فوق الفول السوداني والحمص وراحت تقلبه ، ورماها عاطف بنظرة متسائلة وقال :

\_ منين يا ماما جبتي الشيكولاته دي ؟

فلكزته من تحت المنضدة وكانت كل قسماتها تصرخ فيه: اسكت. وجلست جيهان وجلس سامى قبالتها وراحوا جميعا يعدون لفافات الهدايا التي ستوزع على الصغار والكبار في « السبوع ». وراحت هالة تحاول أن تبعثر ما تصل إليه يدها وأمها تحجزها.

وغافل عاطف أمه وسرق قطعة شيكولاتة وقشرها وناولها للكلب ، ولمحته سوسن فقالت :

> ـــ ماما الحقى . عاطف بيأكل الكلب شيكولاته . فقال عاطف متبجحا بعد أن انكشف أمره :

> > ــ هو يعني اللي ح يكلوها أحسن منه ؟

وأرادت زينب أن تعلن عن كرمها وسماحتها فقالت :

ده روح يا سوسن ياكل كل اللي نفسه فيه ، يستاهل كل خير ، ده

من يوم ما دخل بيتنا جانا الفرح كله والخير كله .

ولم يعجب ذلك الكلام عاطف فقال:

ــ أمال رمياه رمية الكلاب في السطح ليه ؟

وضعت قلة فيها شمعة كبيرة مضاءة طوال ليلة « السبوع » في غرفة نوم أحلام وابنها ، فالشمعة المضيئة لتكون كل أيام المولود أنوارا . والقلة ليشرب في الصباح رجل حكيم وآخر طويل العمر وثالث هادئ النفس ، ليشب الوليد حكيما طويل العمر هادئ الطبع .

واستيقظ الجميع مبكرين تأهبا « للسبوع » ، فلما وقعت عينا زينب على حسين قالت له :

\_\_ تعال اشرب من القله.

فسخر منها فإذا بها تقول له :

\_ ما فيش حد هنا نفسه أهدا من نفسك .

و لم يستطع أن يتملص منها فقد قادته في خفة ودلال إلى حيث ترقد ابنته ، ورفعت الشمعة من القلة ثم قدمت له القلة وهي تقول :

\_ اشرب ، دى ميه بزهر .

ورفع حسين القلة وشرب ، وكان سامى ومراد ونبيلة وسوسن وعاطف قد جاءوا يشاهدون أباهم وهو يشرب ، فلما أعاد القلة إلى مكانها مد سامى يده إليها ليرفعها فإذا بأمه تقول له :

\_ سيب القله يا سامي .

ونظر سامي في إنكار إلى أمه فقالت نبيلة :

\_ انت عايزه يطلع غيار زيك .

فقال سامي في إنكار:

\_ بقى أنا غيار ؟

\_ ده انت تغير من هدومك .. ورتنبي الويل من غيرتك .

وقال مراد :

\_ أشرب أنا ؟

فقالت أحلام لتشارك في اللعبة:

\_ عشان يطلع مطيور زيك .

\_ الله بسامحك .

وقالت سوسن :

\_ طب هاتوا أشرب انا .

فقال مراد:

\_عشان يطلع فتان زيك . كل حاجه يجرى ويقول الحقى يا ماما ..

الحقى يا ماما .

وصمت عاطف لم يشأ أن يتعرض لألسنتهم الحداد ، وجاءت هالة فإذا بأحلام تقول :

\_ والنبي تسقيها يا ماما م القله .

فقالت زينب:

\_ لأ . ما حدش ح يشرب منها إلا حماكي لما ييجي .

فقال سامي :

ـــ واشمعنی حماها یعنی ؟

\_ عشان ياخد منه طول العمر .

فقال مراد .

\_ ووسعان الكرش.

وابتسموا جميعا ، و ا يشأ الأب أن يقال إنه سكت على هذه الم . . فرية فقال :



ــ عيب يا ولد .

وقالت أحلام:

... لما ييجي جلال . خلوه يشرب م القله .

فقال سامي:

\_ واشمعنی جلال ؟

فقالت أحلام:

ـــ عاقل ورزين ، يطلع ابنه زيه .

وجاء جلال وأبواه فإذا بزينب تقودهم إلى غرفة أحلام ، فما أن انتهوا من السلام والتحية حتى قدمت زينب إلى مصطفى علوان القلة وهي تقول له :

\_ اتفضل اشرب.

\_ أنا مش عطشان ، كتر خيرك .

ـــ لأ ده عشان ياخد .. ياخد طبعك الحلو .

فقالت أم جلال:

ـــ هو كده ؟ طب هاتوا أشرب بقى .

وناول مصطفى زوجته القلة بعد أن شرب منها ، فلما رفعتها لتشرب تبادل حسين وزينب وأو لادهما نظرات استياء . وكأنما أرادت زينب أن تمحو أثر شربة حماة ابنتها فقالت وهي تدفع بالقلة إلى زوج ابنتها :

ــ خد اشرب يا جلال .

فقال وهو يرنو إلى زوجته في حب :

(الحفيد)

\_إذا كان ولا بد تشرب أحلام ، ياريت ياخد طبعها الحلو .

وكانمأ ضايق ذلك القول أمه فقالت :

ــــطبعا ، قالوا لجحا تحب مين فى العيله ، قال اللي بتنام فى حضنى كل ليله .

وتقاطر الجيران نساء وفتيات وأطفالا وغصت الشقة بهم حتى لم يعد هناك موضع لقدم ، وجاءت نبيلة إلى أمها وقالت :

ب أوزع عليهم دلوقت الملبس والشمع ؟

ولمحت زينب جيهان بين الوافدات فقالت لها:

ما تتعبیش نفسك ، خلی سامی و مراد و جیهان یفرقوا الملبس
 والشمع ..

وراح سامى ومراد يوزعان لفافات الفول السوداني والحمص وقطع الشيكولاتة ، وأخذت جيهان توزع الشمع ، فلما أعطت سوسن شععة أبت أن تتناولها وقالت :

أنا عايزه شمعه كبيره من اللي مخبياهم ماما تحت السرير

وسمعتها نبيلة فأخذتها بعيدا وهمست في أذنها أنها ستأخذ ما تريد بعد أن ينصرف المدعوون .

ودخلت زينب غرفة أحلام وراحت تدق بالهاون بالقرب من أذن الوليد وهي تقول :

ــ اسمع كلام أمك .. اسمك كلام ابوك .

فقالت أم جلال منتقدة :

\_ الكلام ده ما بطل يا ست زينب .

فقالت زينب وهي مستمرة في دق الهاون.

\_ لأ يا اختى ، أنا ما دقتش لهاله عشان كده بتتفزع وتتفزز من أى صوت .

و لم تكتف زينب بدق الهاون بل أتت بغربال وضعت فيه شيكولاتة وقوالب سكر ثم وضعت المولود في الغربال وجعلت تغربله في حنان . وخرجت به إلى حيث المدعوون مكدسين فقالت أم جلال :

\_ وإيه لازمة الشيكولاته والسكر ؟

فقالت زينب:

\_ عشان أيامه كلها تبقى حلوه .

ثم حملته ونحت الغربال بعيدا وقالت :

\_ ولعوا الشمع .. تعالى يا أحلام .

وإذا بأعواد الكبريت تتوهج وإذا بالشموع تضاء وتسرع نبيلة لتطفئ الأنوار الكهربائية . وجاءت أحلام وحملت ابنها لتسير في موكب النور فكان مشهدا يهز الأفئدة . ولاح التأثر في وجوه حسين ومصطفى علوان وجلال . ولم يكتم مصطفى عواطفه فقال في تأثر عميق :

\_ الرجلين الحمر تطول العمر .

وارتفعت أصوات النساء والفتيات والأطفال:

حلاقـــاتك برجــالاتك حلقه دهب في ودانـاتك وسارت أحلام تحمل الوليدومن خلفها أمها وحماتها وأختها ، وبعض

النسوة والفتيات والأطفال يتدافعون حولهن وينشدون :

يارب يا ربا تكبر وتبقى قدنا وتقيد الشمعه زينا .

ووصل الموكب الصاخب إلى باب الشقة وحسين ومصطفى وجلال يرقبون الأحداث في انفعال شديد ، وما أن هب الهواء من الباب المفتوح حتى أخذت زينب المولود من ابنتها وقالت لها :

\_ ارجعي انتي ، إنتي طريه .

وخافت أحلام على ابنها فقالت لأمها :

\_ الدنيا برد عليه .

\_ ما تخفیشی . . أنا مكلفتاه قوى .

ولم يطمئن قلب الأم فقالت وهي مشفقة على وليدها :

ــ يعنى لازم يوصل لغاية الشارع ؟

فقالت زينب:

ــ ده راجل ، هو ح يفضل قاعد في البيت .

وعادت أحلام إلى غرفتها وهي ترتجف خوفا على ابنها ، ولولا خجلها لخطفته منهن وضمته في حنان إلى صدرها .

وهبطت زينب الدرج وهى تحمل حفيدها والنسوة والفتيات والأطفال ينشدون ودوت الزغاريد ، وراح الكلب ينبح من السطح دون أن يأبه له أحد .

وتدافع الأطفال في السلم وهم يحملون الشموع ، وخرج حسين ومصطفى وجملال ينظرون ؛ كانت وجوههم تترقرق بالبهجسة والانشراح . ولما وصل الجميع إلى باب البيت انصرف بعضهم وعاد البعض خلف زينب وأم جلال ونبيلة .

وانفض الحفل فلم يبق في الشقة إلا أبناء حسين ومصطفى وزوجته وجلال ، وقالت أم جلال :

\_ نستأذن بقى .

فقالت زينب وهي تدفعها في رفق لتجلس:

\_ لا والنبي .. لما ناكل لقمه سوا .

فقالت أم جلال:

\_ معلهش اعفينا النهارده .. يوم تاني .

وضايق مصطفى علوان إصرار زوجته على الانصراف قبل أن يتناولوا عشاءهم فقال :

\_ الست حلفت ، انتى عايزه تنزلى حلفانها الأرض ؟!

\_ مش لاقيه المريله يا ماما .

صاحت سوسن وهي تدور في غرف الشقة ثم قالت :

\_ أنا عارفه الأجازه خلصت بدري ليه ؟

فقال عاطف وهو يبحث عن فردة الجورب تحت السرير:

ـــ ما هي الأيام الحلوه دايما عمرها قصير .

وعثر على الجورب فدس رجله فيه ولبس الحذاء ، وجعل يتلفت منقبا ثم قال :

فين كراسة الحساب ؟ بقى يوم ما اخلص الواجب ما القهاش !
 و لم يعثر عليها فاشتد ضيقه ، وكاد الغيظ يخنقه فقال :

و م يعتر عليها فاست صيفه ، و داد العيط يحقه فقال . ــــأنا عارف مين اللي اختر ع المدارس ؟ ما كانش مات قبل ما يختر عها

ويريحنا .

فقال مراد وهو يرشف كوب الشاى :

ـــ دى المدارس حتخليك يني آدم .

و لم يعجب ذلك الكلام عاطف فقال له :

ــ يعنى اللي ما دخلوش مدارس ميني آدمين ؟ أمال ملوك زمان

ازای بقوا ملوك وهم ما دخلوش مدارس .

ووقفت زينب تصغى إلى ذلك الحوار وفي يديها صينية عليها أكواب الشاي ، فلما رآها مراد قال ساخرا من أخيه :

ـــ تعرفی یا ماما إن ما كنتوش ودیتوا عاطف المدارس كان بقی ملك .

فجاءت سوسن وقد عثرت على مريلتها وسمعت طرفا من الحوار فقالت لأمها :

\_ يعنى إيه ملك يا ماما ؟

فقالت الأم وهي تضع لهم صينيه الشاي :

\_ اشربوا بلاش غلبه عشان تفطروا وتروحوا مدارسكم قبل ما تتأخروا .

و تناول عاطف كوب الشاى بعد أن رشف منه رشفة وقال:

\_ ما عند كيش بسكوت يا ماما ؟

فقالت في تأنيب:

\_ اللي ما في الشقة لقمه .. خد من بابا محسه صاغ وروح اشترى

لنا عيش .

فقال مراد:

\_ خد عشره صاغ وهات بخمسه عيش وبخمسه طعميه .

فقال له عاطف:

ـــ ما تروح انت .

وكان حسين قد خرج من غرفته فقال :

- خد يا مراد العشره صاغ.

وأسقط فى يد مراد فذهب إلى حيث وقف أبوه وتناول العشرة القروش وانصرف ، وجاء سامى بعد أن اغتسل وهو يجفف شعره فقال له أهه :

- \_ انت مش رایح النهارده یا سامی ؟
  - \_ عندى محاضره الساعه حداشر.

واقترب سامي من أبيه وقال:

- ـ عايز تلاته جنيه .
  - ليه يا سامي ؟

ــ اشترى الملازم اللي نازله النهارده .

ولما سمع الأولاد ما طلب سامي هرعت سوسن وعاطف إلى أبيهما وقالت سوسن :

ــ الناظرة قالت لنا كل واحده تجيب جنيه .

٩ ساله ؟

\_ مساهمة في نشاط المدرسه .

وقال عاطف :

ــ وانا برضه قالوا لي هات جنيه .

وعاد مراد يحمل الخبز وقرطاس الطعمية ، فإذا بزينب تنادى :

ــ تعالى يا نبيله قبل الطعميه ما تبرد .

ووضع مراد ما حمل على منضدة وقال:

\_ اعملي لي سندويتش يا ماما أنا اتأخرت.

وتناول مراد الساندويتش من أمه وهرع نحو الباب. فإذا بأبيه يقول له:

\_ و انت جاى يا مراد هات حسين معاك . . الواد وحشنا .

وفتح مراد الباب وانصرف ، والتفتت نبيلة ــ التي جاءت وقد انتفخ بطنها \_ إلى أمها وقالت :

\_ بابا اتعلق بابن أحلام .

\_ يا بنتي قالوا في الأمثال: أحب الولد ولد الولد.

وخرج عاطف وتبعته سوسن ، وجلست الأم مجاملة لابنتها نبيلة فما كانت لتأكل إلا بعد أن يأكلوا جميعاً ، ونادت على زوجها وابنها قالت:

\_ حسين .. سامي .. تعالوا كلوا لكم لقمه .

وأقبل حسين وسامي يشاركانهما الطعام ، فقالت زينب :

\_ تاكلوا إيه النهارده ؟

فقال حسين:

\_ اللي تعملوه ..

فقالت زينب .

ــــ ما تدوخونيش كل يوم .. قولوا تكلوا إيه ؟

فقال سامي:

ــ بسله ورز .

\_\_ النهادره الاتنين ما فيش لحمه ، رأيكو تحدقوا النهارده تاكلوا كشرى .

فقال سامي:

\_ لما انتى ناويه تأكلينا كشرى بتسألينا ليه ؟

كان ذلك شأنها تسالهم عما يريدون أن يأكلوا ثم تصنع لهم ما يحلو لها .

وانصرف الأب ثم سامي و لم يبق في البيت غير زينب ونبيلة وهالة ، فقالت نسلة لأمها :

ــ خشى انت استريحي النهارده وانا اعمل الكشري .

فقالت زينب :

\_ أستريح من أيه ؟

\_ من دوشتهم .

ـــوالله البيت من غيرهم ماله طعم ، مش عارفه ح اعمل إيه لما يكبروا ويتجوزوا ويصفصف علينا البيت أنا وابوكي .

وشردت زينب مفكرة ، ولاحظت نبيلة مسحة من الأسى تكسو وجه أمها فقالت لها :

.... ما تفكريش في الحكايه دي لسه بدري .

\_ الأيام بتجرى يا نبيلة ، أنا ولدتك من عشرين سنه فاتوا زى ما يكونوا يومين . فاكره لما كنتي زى سوسن ؟ أدى انتى اتجوزتي وكلها

جمعه واللا اتنين و ح تبقي أم .

وشردت نبيلة ولاحظت زينب سهومها فقالت لها :

ــ الدنيا على كده .. ما تفكريش .

ودخلت الأم المطبخ وتبعتها نبيله ، وإذا بهالة تسير خلفهما تتعثر في أرجلهما . وبعد الظهر عاد الأولاد إلى البيت وقفل حسين راجعا وكان أول ما قاله :

\_ هو مراد جه ؟

فقالت زينب:

\_ لسه .

\_ يبقى راح يجيب حسين .

وقبل أن يلتفوا حول الكشري دق جرس الباب فصاحت سوسن :

\_ مراد جه .

وهرولت إلى الباب وفتحته ثم صاحت في فرح:

\_ جاب حسين معاه .

وقام حسين ليستقبل حفيده ونبيلة ترقبه في عطف ، فلما وصل إلى حيث كان مراد سمع سوسن تقول متوسلة :

\_ أنا أشيله .. أشيله والنبي .

وحمل حسين حفيده وراح يداعبه .

فإذا بزينب وأبنائها جميعا يهرعون لمداعبة الطفل ، وارتفعت الأصهات :

ــ أنا أشيله .. أنا أشيله .

فالتفتت إليهم زينب وقالت:

ــ اشمعني ده حلي ، ما كلكم بتهربوا من شيل هاله .

وأراد حسين أن يرضيهم جميعا فوضع الطفل على الأرض ، فإذا بهم يركعون على ركبهم وأيديهم حتى حسين وزيب فعلا ذلك وراح كل منهم يحاول بحركات وجهه وإخراج لسانه وتلعيب حاجبيه أن يلفت نظر الطفل إليه . ورأى عاطف أن عقد الأسرة لا بد أن يكتمل فأسرع إلى السطح وأحضر الكلب ووضعه معهم فى الحلقة التى ضربت حول حسين الصغير .

ومر بعض الوقت وجاء جلال وقال:

\_\_ فين سونه ؟

فقالت زينب:

- جوه مع جده .

\_ أحلام عايزاه لاحسن وحشها .

ودخل وحمل ابنمه وانصرف ، وهمرع عاطسف وسوسن إلى التلفزيون ، وجاءت جيهان ودخلت تذاكر مع سامى ، وسمع صوت كلاكس سيارة فقال مراد :

ـــ صاحبي جه .. أنا رايح يا ماما أذاكر معاه .

فقالت زينب:

ــ طب ما تذاكر هنا .

ـــ فين ؟.. سامي و جيهان بيذاكروا في الأوده ، السنه دى مش عايزه لعب دى الثانه بة العامه .

\_ والله أنا خايفه عليك .

ــ بقى جيهان بتذاكر مع سامى وما حدش خايف عليها و خايفه على · أنا أذاكر بره .

وخرج مهرولا وهبط الدرج يركب إلى جوار صديقه فى السيارة وانطلقت بهما ، وعند شارع من شوارع القاهرة الهادثة وقفت السيارة وصعدت إليها فتاتان ثم انطلقت السيارة والضحكات تتجاوب فى أرجائها .

وترك عاطف التلفزيون وذهب إلى أبيه وقال :

ــــ النهارده كان فيه روايه في التلفزيون غريبه قوى خلصت من غير ما حد يتجوز في آخرها .

وقالت له زينب :

ے طب خش انت و اختك و ذاكروا بقى ، شايفين سامى بيذاكر ازاى و مراد خرج فى البرد ده عشان يذاكر ، كبدى عليه ح يموت نفسه فى المذاكر ه السنه دى .

بخار الماء يملأ الشقة وأحلام وجلال وحسين يغدون ويروحون في قلق ، ومن شدة قلقهم يتبادلون حمل حسين الصغير كلما هم بالبكاء ، وارتفع صوت زينب قائلة :

\_ ناولينا الميه السخنه يا أحلام .

وحملت أحلام الماء الساخن واتجهت به إلى الغرفة المغلقة ، وسرعان ما ارتفع بكاء المولود ، فخرجت زينب وقالت :

ـــ مبروك ولد .

وخرجت الدكتورة ودخل حسين وجلال وأحلام يباركونالنبيلة ، وسرعان ما خرجت أحلام يتبعها زوجها فقالت وقد ظهر الضيق فى وجهها :

ــ والنبي ابن خالك ده بايخ .

وها جمت رأس جلال فكرة وما أسرع أن عزم على إنفاذها ، فحمل ابنه وخرج لا يلوى على شيء وانطلق إلى بيت ابن خاله ، فلما طرق الباب فتحه له شفيق ، فما أن رأى ابن جلال حتى بش وحمله ودخل وهو يداعبه ، فإذا بحسين الصغير يبتسم فيستشعر شفيق أن الكون كله قد

أشرق .

وجلس الرجلان ولا حديث بينهما فقد كان وجود الطفل أفصح من كل كلام ، فنهض شفيق وعاد يحمل سيكولاتة وقال لجلال :

\_ ياكل شيكولاتة ؟

\_ بياكل .

وقدم شفيق الشيكولاتة للطفل فراح يأكلها وقد لوث فمه ، فلما أتى عليها حمله شفيق وذهب إلى الحمام وراح يغسل له فمه والطفل يعبث بيده في الماء المنهم من الصنبور .

وأحس شفيق مشاعر رقيقة . إن كل كآبة قد غسلت من صدره وانسكبت فيه عواطف ناعمة رقيقة حانية ، ولم يستطع أن يكبح جماح إحساساته فقال :

\_ ابنك لطيف يا جلال .

ورى جلال أن يطرق الحديد وهو ساخن فقال:

\_ نبيله جابت لك ولد ألطف منه .

فقال شفيق دون تفكير :

\_ هي نبيله ولدت ؟

... ولدت وجابت لك ولد ألطف من حسين .

\_ مش معقول :

فقال له جلال وقد دنا منه .

\_ مش تعقل بقي وتسيب عناد الأطفال ده .

و لم يحر شفيق جوابا بل ضم إليه الطفل وقبله قبلة ترجمت عن التحول الهائل الذي طرأ عليه ، فقال له جلال :

ــ طب قوم بقى نروح لها .

فقال له شفيق وهو يبتسم :

\_ يعنى مش تيجي معايا لما ابيع العربيه .

فقال له جلال في انشراح:

\_ *ieu* ?

فهز له شفيق رأسه أن نعم ، وانصرف الشابان وركبا السيارة لآخر مرة وانطلقا بها إلى محل بيع وشراء سيارات وقد غادراه بدونها .

ودق جرس باب شقة حسين فهرعت سوسن وفتحت ، وما أن رأت جلال و شفيق حتى صاحت :

\_ شفيق جه يا ماما .

وخف حسين لاستقبال زوج ابنته وهو يكاد يطير من الفرح ، وجرى عاطف إلى نبيلة يزف إليها البشرى . وما أن وقعت عينا حسين على شفيق حتى اغرورقت عيناه بالدموع و لم يتالك حتى عانقه . ومسح جلال من عينيه دمعة كبيرة انحدرت على خده ، وهرع الجميع إلى شفيق فرحين . إنهم يصافحونه مصافحة الغائب الذى عاد . واستقبلته زينب مرحبة :

\_ أهلا .. أهلا وسهلا .. ادخل .. ادخل شوف ابنك .

ودخل شفيق ، وما أن تلاقت عيناه بعيني نبيلة حتى اغرورقت عيناه

بالدموع وسحت نبيلة العبرات فقالت زينب :

ــ ده مش وقت عياط .

وخطفت أحلام ابنها من أبيه وراحت تقبله لتنفس عن العواطف المكبوتة في صدرها ، فلو طاوعت نفسها لأجهشت بالبكاء .

وجاء سامي يداعب شفيق فقال:

ـــ والله كبرنا وبقى لنا أولاد .

فقال له شفيق:

\_ عقبالك لما تبقى راجل زينا .

وجاء مراد وقال :

ـــ الجو لذيذ قوى .

فقالت له أحلام:

\_ وانت اش عرفك ؟

وانسل مراد دون أن ينبس بكلمة ، ومالت زينب وحملت المولود وقدمته إلى أبيه ، فحمله شفيق وقد انداحت رقة في جنباته وظل يرنو إليه في حب عميق ، فقالت له نبيلة :

\_ مش حلو ؟

فقال في صدق:

ـــ ما فيش أجمل من كده .

فقال سامي :

ــ خنفسة شافت ولادها على الحيط ، قالت ما أحلى ولادى زى ( اخميد )

اللولى في خيط .

فقالت أحلام:

\_ ده والنبي كله انت .

فقال سامي :

ـــ هو انا وحش كده ؟

فقالت نبيلة:

ــ يا ريتك كنت حلو زيه .

وجاءت زينب بفنجان مغات وقدمته إليه وقالت:

\_ اتفضل .

فأعاد شفيق ابنه إلى جوار أمه وتناول الفنجان ، وقالت له زينب :

ــ خلاص ، افضل معانا لغاية « السبوع » .

\_ متشكر ، أنا السبوع ح اعمله في بيتنا .

وازدرد حسين ريقه ، فما كان يحتمل حدوث ما حدث يوم « سبوع » ابن أحلام ، وما انتهى شفيق من شرب المغات حتى عاد يحمل ابنه ، ثم التفت إلى حماه وقال :

\_ ح اسميه حسين .

فقالت أحلام:

\_ احنا سبقناك .

فقال شفيق:

\_ وفيها إيه ، ابنكم اسمه حسين جلال وانا ابنسي اسمه حسين

شفيق .

وطغت عواطف حسين فذهب إلى شفيق واعتنقه .

كان جلال وأحلام يدفعان عربة ابنهما أمامهما وإلى جوارهما يسير شفيق ونبيلة يدفعان عربة أخرى بها ابنهما . كان الجو لطيفا والطريق هادئا وكانت المشاعر التى تفيض بها النفوس . وساد الصمت بينهم فكل منهم كان ينعم بالانشراح الروحى الذى جعله يحس أنه يهيم فى ملكوت من لطف وسحر وجمال .

وأراد جلال أن يقطع الصمت الذي لفهم فالتفت إلى شفيق وقال :

\_ أنهين ألذ ، سواقة العربية والا زق العربيه ؟

فدفع شفيق عربة ابنه أمامه وقال :

ـــ زق العربيه ألذ .

فقال جلال مداعبا نبيلة :

\_ خلاص تيجي له أخت .

فقالت نبيلة في تصنع:

ــ توبه ، كفايه واحد ، هو احنا قادرين عليه .

وقال شفيق :

ــ ده قاطع أبونيه عند الدكتور من يوم ما جه ، وعبال ما نلاقي علبة

اللين بندوخ .

و قالت نبيله في إشفاق:

ــ الله یکون فی عون ماما . أنا عارفه ربتنا ازای .

ولم يعجب ذلك الكلام أحلام فقالت:

\_ أنا ح اجيب له أخ واللا أخت ، لو فضل وحده ح يطلع أناني .

فقال شفيق:

\_ أناني أناني بس كفايه على كده .

وقالت أحلام لأختها :

\_ إلا يا نبيله لما ح تتوظفي ح تعملي فيه إيه ؟

\_ ح اسيبه عند ماما الصبح ولما ارجع ابقي آخده .

فقالت أحلام:

\_ تفتكرى الماهيه اللي ح تاخديها تستاهل المرمطه دى كلها ؟ ح تدوّيي بها جزم وشربات وح تركبي بها تاكسيات .

فقال شفيق:

\_ انتي متفائله قوى ، هي فين التاكسيات دى ؟

وقالت أحلام وقد ذهبت لتغطى ابنها جيدا بينها جلال يدفع العربة :

\_ لو الحكومه تنصف كانت قالت : الست المتجوزه ومخلفه تقعد في

البيت وتدى لجوزها نص ماهيتها .

فقالت نبيلة معترضة :

\_ وليه ما تاخودهاش هي ؟

ــ ياخدها هو تاخدها هي المهم إن الستات اللي متجوزين ومخلفين يقعدوا يربوا اولادهم ، تربيه الأولاد أهم من الشغل اللي بيشتغلوه ده إن كانوا بيشتغلوا حاجه . دى زيادة عن إن أزمة المواصلات ح تتحل ، وإن الدوله ح توفر الفلوس اللي بتشترى بيها كاليات وتواليتات للستات اللي بيشتغلوا ويخرجوا كل يوم .

ومرت الأيام وخرج حسين مع أحفاده ، قصد حديقة من الحدائق وسار في يده حسين جلال وحسين شفيق وفي يده الأخرى زينب الصغرى ابنة أحلام ، إنه كان سعيدا يستشعر أن شبابه قد عاد إليه وأن الدنيا تبتسم له .

ومرت الشهور وخرج جلال وزوجته وشفيق وزوجته للنزهة .

كان جلال قد أمسك ابنه حسين فى يد وفى يده الأخرى زينب الصغيرة وأحلام تدفع العربة فيها وليده الثالث ، وسار شفيق وقد قبض على يد ابنه فهو يخشى أن يجرى ، فحسين شفيق لا يطيق أن يمشى الهوينى ، وقد دفعت نبيلة العربة وفيها مولودها الثانى ، والتفت إليها جلال ، قال :

- \_ البنت التالته سميها أحلام.
  - \_ لأ يا خويا كفايه .
  - \_ ما انتى نفسك في بنت .
  - فقالت نبيلة وهي تضحك :
- \_ دول عايزين أب سعيد وأم حديد .

فقال جلال مداعبا شفيق:

ــ خلاص ! أبوهم غنى وامهم عيني بارده عليها .

فقال شفيق:

ـــ القرشين طاروا والشكوى لغير الله مذلة ، ده احنا لو جبنا التالت ح نقف على باب سيدنا الحسين ونقول الله .

فقال له جلال:

ــِ يا راجل قول الحمد لله . انت بتشتغل ونبيله بتشتغل .

وقالت أحلام:

ــ وبترمي اولادها على امها .

وتصرمت أشهر وانقضى عام ، ورن الجرس فى بسيت حسين ، فأسرعت زينب وفتحت وإذا بنبيلة قد جاءت بأولادها الثلاثة وقالت زينب لأحفادها :

\_ أهلا .. أهلا بالحلوين .

وانسلت نبيلة وهي تقول:

ــ يمكن اتأخر في الشغل النهارده .

\_ على مهلك يا بنتي .

\_ معلهش ، أنا عارفه إنهم بيتعبوكي .

\_\_ أبدا يا نبيله .

ودخلت زينب بعد أن حملت الصغيرة التي كانت على كتف ابنتها وقالت لحفيدها : \_ حسين امسك إيد اخوك وتعالى .

و سارت وأجلست الطفلين وقالت لهما :

\_ خليكو هنا لما أشوف لكم كل واحد بيضه .

ودخلت إلى المطبخ وهي تحمل حفيدتها وتداعبها ، وما لبثت أن سمعت جرس الباب فقالت وهي تضع البيض على المار :

\_ حاضر .. جايه .. جايه اهو .

وفتحت الباب فإذا بجيهان تحمل ابنتها على كتفها :

ــــ لا مؤاخذه يا تانت ، والنبى تخلى بنتى مع اولاد نبيله لغاية ما اخلص الامتحان ، هانت آحر امتحان .. أصل جوزى سافر امبارح .

ــ من عيني يا جيهان . قعديها معاهم .

ودخلت جيهان وأجلست ابنتها مع حسين الصغير وأخيه ، فمال حسين وقبلها .

فقالت زينب:

\_ لايقين لبعض . مش كده يا جيهان ؟

فابتسمت جيهان وقالت:

ــ خلاص يا تانت ، خدوها من دلوقت .

ـــ ربنا يهنيكي بيها .

وقالت جيهان :

ـــ هو سامي خرج ؟

\_ خرج من بدري .

- ــ ادعى لنا يا تانت .
- ــــ ربنا ينجح مقصودكم يا بنتي .

وانصرفت جيهان ، وعادت زينب إلى المطبخ فألفت الماء يـغلى والبيض يتحرك فى الإناء من شدة البخار ، فأطفأت النار وأخذت البيض وذهبت إلى حيث كان الأطفال وجلست على الأرض وقشرت أول بيضة ، فأخذها حسين فإذا بأخيه يستاء فقالت له :

\_ معلهش ، ح اديك البيضه اللي باقشرها دى .

ومدت ابنة جيهان يدها وقبضت على بيضة كانت فى الطبق ، فإذا بها تصرخ ، كانت البيضة لا تزال ساخنة . وفزعت ابنة نبيلة فبكت لبكاء ابنة جيهان . ولما رأى حسين وأخوه بكاء أختهما انخرطا فى البكاء وراحت زينب تحاول إسكات الأطفال الثلاثة دون جدوى ، صفقت لهم . . انشالت وانحطت فى مكانها كالقرد ، أصدرت أصواتا لعل الأطفال ينشغلون بها عن البكاء ، صنعت كل ما فى طاقتها دون جدوى ، وظل البكاء مستمرا بل ازداد كأنما البكاء يجلب البكاء ، ونفد صبر زينب فقالت فى غضب ويأس :

ــ بقى يا ربى هم يزربوا وتيجى على راسي انا ؟!

مرت خمس عشرة سنة منذ زفاف أحلام ، وكان حسين في غرفة النوم شاردا .. يعجب كيف انقضت سريعا كل تلك السنين . إنه سيبلغ سن الستين بعد أيام ، سن التقاعد ، وهو لا يدرى ماذا ستكون حياته بعد ذلك ، وقد اعتاد أن يخرج في الصباح ويتجه إلى مكتبه ويمكث به حتى منتصف الثانية بعد الظهر ، وكثيرا ما كان يعود إليه في المساء . صار مكتبه قطعة منه يحز في نفسه أن يفارقه بعد صحبة السنين الطويلة . إنه وإن كان جمادا إلا أنه كان بالنسبة إليه أكثر حياة من كثير ممن عرفهم وممن مروا في حياته مر الكرام . ويا طالما شهد ذلك المكتب أيام بهجته وأيام سروره وأيام ضيقه ، فبين جدرانه جرت أحلى الذكريات . ولحت زينب الأسى في وجه زوجها فقالت له :

ــ بتفكر في إيه يا حسين ؟

فقال حسين وهو يبتسم ابتسامة مريرة :

\_ ح يبقى عندى ستين سنة بعد اربع تيام .

فقالت زينب :

ــ ربنا يديلك طولة العمر ، أبويا عاش لما بقى عنده تمانين .

و لم يكن بلوغه سن الستين هو الذى يشغله إنما كان يشغله أنه لن يذهب إلى مكتبه ، ليتهم يسمحون له بأن يذهب إليه بعد التقاعد دون أن يتقاضى شيئا فوق معاشه . إن ما يحز في نفسه أنه سيفقد عادته ، وإنه لمن الصعب أن يعتاد المرء على شيء لم يألفه من قبل بعد الستين ، فقال :

\_ ح اتحال ع المعاش يا زينب .

\_ الحمد لله ، لا عندنا اللي بيعيط ولا عندنا اللي بيوقوق ، خلصنا ذمتنا منهم كلهم .

و لمعت في ذهنها فكرة فقالت:

\_ انت طول عمرك مهنينا ، لازم نحتفل بك .

فقال حسين في خوف :

\_ لأيا زينب ، ما فيش لازمه .

صرفت علينا كلنا ح تبخل على نفسك ؟

وتردد وأخيرا رأى ألا مفر من أن يقولها:

\_ لازم يا زينب نمسك إيدينا ، انتى عارفه المعاش يعني إيه .

\_\_ راضيين والحمد لله ، وهو لما نحتفل بيك لازم نبعزق ، ح نعزم الأولاد ع الغدا واللا العشا ، ويوم ما يبقوا كلهم حوالينا يبقى يوم عيد .

ــ احنا دلوقت يا زينب ما نقدرش نكفيهم عيش .

ــ الخير كتير ، والنبي لانفرح بيك زي ما فرحتنا كلنا .

ويوم أتم الستين اجتمعت الأسرة حول المائدة ، إنها لم تعد أسرة بل صارت قبيلة ، ومدت المائدة حتى وصلت إلى الغرفة التسى كانت للبنات ، وجلس حسين على رأسها ، وعن يساره شفيق و خمسة أبناء ، وبعدهم جلست نبيلة ، وجلس سامى وبعده ولدان ثم زوجته ، ثم سوسن وابنتها وزوجها ، وعن يمينه جلس جلال وثلاثة أبناء ثم أحلام ، وبعد أحلام جلس مراد وابنه وزوجه ، ثم هالة وزوجها ، وجلس عاطف وحده فلم يتزوج بعد .

وجاءت زينب من المطبخ تحمل حلة كبيرة بها مغرفة ، فلما رآها الأحفاد صاحوا :

\_ تیتا .. تیتا .. تعیش تیتا .

وقالت وينب لتغريهم على التزام الصمت :

\_ اللي ح ياكل وهو ساكت جدو ح ياخده الملاهي .

وراحت تغرف من الحلة وتضع في الصحاف الموضوعة أمام الجميع ، فاذا وصلت إلى هالة قالت لها :

\_ خدى بالك من جوزك يا هاله .

وإذا غرفت لمراد وابنه وزوجته قالت :

ـــأكّلابنك ومراتك يا مراد .

وغرفت لأحلام وقالت لها:

\_ مش ح اوصيكي على اولادك يا أحلام .

وغرفت لجلال وقالت :

ــ يعجبنى جلال . مش عايز حد يأكله .

ووصلت إلى زوجها فغرفت له وقالت :

ـــ ربنا يخليك لنا ميت سنه .

وغرفت لشفيق ولأولاده الخمسة ولنبيلة ثم قالت لها :

ــ شدى حيلك يا نبيلة ح تبقى عيله زينا .

فقال جلال مازحا :

\_ قصدك قبيله ..

وابتسم حسين فابتسم الجميع ، وغرفت لسامي وقالت له :

أوعى تاكل أكل ولادك يا سامى .

وراحت تغرف لولديه ولزوجته .

وغرفت لسوسن وهي تقول :

\_ مين كان يصدق ان سوسن ح تكبر ويبقى لها بنت .

وقالت أحلام :

ــ اقعدى بقى يا ماما .

فقالت زينب وقد أفرغت الحلة وانطلقت صوب المطبخ:

ــ لما اجيب لكو المكرونه .

وغابت قليلا ثم عادت تحمل صاجا أشبه بصاج المكرونة في محال السندويتشات ، وصاح الأحفاد :

ــ تيتا .. تيتا .

اللي ح ياكل وهو ساكت ح ياخده جدو الملاهي .

\* \* \*

وانطلق حسين في رفقة أحفاده إلى الملاهي ، وذهب إلى الشباك

وقال:

\_\_ اتناشم تذكره .

فنظر الرجل إلى الأولاد ، ثم رمق حسين في إشفاق وقال :

\_ كفايه تسعه .

وتناول التذاكر واتجه إلى الباب. فإذا بالرجل الواقف عند الباب يلقى نظرة إشفاق على الأولاد ويرق قلبه لحسين فيأخذ منه التذاكر ، ثم ينطلق إلى شباك الحجز ويعيد ثلاث تذاكر ثم يقفل عائدا إلى حسين ويعطيه ثمن التذاكر التي ردت ويقول له :

ــ كفايه سته .

ويدخل الأحفاد إلى الملاهى ويجرون هنا وهناك فيصيح حسين : \_\_حسين جلال .. حسين شفيق .. خلوا بالكو من اخواتكم ومن

الأولاد .

فرد عليه أحدهم:

ـــ استریح انت عندك و ح نبقي نيجي لك .

وذهب حسين وجلس على مقعد وغفا ، وانتشر الأحفاد في الدنيا الضيقة ـــ وما أسرع ما سينتشرون في الدنيا الواسعة ، في أرض الله .

## مؤ لفات الأستاذ عبد الحميد جودة السحار

```
_أحم بطا الاستقلال
       ترجم إلى الاندونيسية
                                          _ أب در العماري
                                      _ بلال مؤذل الرسول
       ( محموعة أقاصيص )
                                           _ في الوطيفة
                                       _ سعد بي أبي و قاص
       ( مجموعة أقاصيص )
                                        _ همزات الشياطين
                                     _ أبناء أبي بكر الصديق
                ( رواية )
                                         _ في قافلة الزمان
                (قصة)
                                           __ أمم ة قرطبة
                                          _ النقاب الأزرق
                (قصة)
                                    ــ المسيح عيسي بن مريم
                                          _ أهل بيت النبي
_ محمد رسول الله تأليف: مولاي محمد على
   ترجمة بالاشتراك مع مصطفى فهمي
     ( مجموعة أقاصيص )
                             _. قصص من الكتب المقدسة
      ( مجموعة أقاصيص )
                                          _ صدى السنير
     ترجمت إلى الاندونيسية
                                           _ حياة الحسين
                                         _ الشارع الجديد
                ( رواية )
                                            _ و کان مساء
                (قصة)
                                         _ أذرع وسيقان
                (قصة)
                (قصة)
                                             _ المستنقع
      ( مجموعة أقاصيص )
                                           _ ليلة عاصفة
               ( رواية )
                                              ـــ الحصاد
                (قصة)
                                         _ حسر الشيطان
```

(قصة)	_ الصف الآخر
( رواية )	_ السهول البيض
(قصة)	ـــ أم العروسة
(قصة)	_ قلعة الأبطال
	ـــ وعد الله وإسرائيل
	ــــ عمر بن عبد العزيز
	هذه حیاتی
	الحفيد
	_ ذكريات سيهائية
	_ كشك الموسيقي
	خفقات قلب
	ـــ صور وذكريات
	ــ الإسراء والمعراح
	_ القصة من خلال تجاربي الذاتية
	_ عدو البشر
	_ أبطال الجزيرة الخضراء
	_ النمو . لا يص
	_ الله اكبر
	ثلاثة رجال في حياتها
	_ مسجد الرسول
	_ فات الميعاد - المارك
	_ آدم إلى الأبد
	_ العرب في أوربا الناب من الترآن المنا
	ــــ الدستور من القرآن العظم



مكت معت مع شاع كالموساتي- الغيالا

الثمن ٣٢٥ قرشا

دار مصر للطباعة سيد جوده السحار وشركاه